

**NACRT**

**ZAKON O ŠUMAMA**

**Sarajevo, mart 2010. godine**

## **I OPĆE ODREDBE**

### **Član 1. (Predmet)**

Ovim zakonom uređuje se očuvanje i zaštita šuma i šumskog zemljišta, jačanje njihovih ekoloških funkcija, planiranje u šumarstvu i upravljanje šumama i šumskim zemljištem, ekonomske funkcije, socijalne funkcije, finansiranje biološke obnove i unapređivanje šuma na teritoriji Federacije Bosne i Hercegovine (u daljem tekstu: Federacija).

### **Član 2. (Šume i šumska zemljišta)**

(1) Šume i šumska zemljišta, kao dobro od općeg interesa, uživaju posebnu brigu i zaštitu Federacije, kantona i jedinica lokalne samouprave i koriste se pod uslovima i na način koji su propisani ovim zakonom.

(2) Šume i šumska zemljišta su temeljni prirodni resurs čije vrijednosti se manifestiraju kroz ekološke, socijalne i ekonomske funkcije.

### **Član 3. (Definicija šuma i šumskih zemljišta)**

(1) Pod šumom, u smislu ovog Zakona, podrazumijeva se zemljište obraslo šumskim vrstama drveća i grmlja čija površina prelazi 1000 m<sup>2</sup> i čija je širina najmanje 20 metara i ako njihove krošnje pokrivaju više od 30% zemljišta. Šume se smatraju ekosistemima. Njihov upis u zemljišnim knjigama nije od važnosti u smislu ovog Zakona.

(2) Šumom se smatraju i šumski rasadnici, plantaže šumskog drveća, čistine za trase dalekovoda i drugu javnu infrastrukturu u šumi koja se koristi po osnovu prava za prelazak preko tuđeg zemljišta, šumski putevi i druga šumska transportna i protivpožarna infrastruktura, dijelovi zemljišta koji su predmet pošumljavanja, površine namjenjene rekreaciji, kao i jezera, tekuće površinske vode i druge površinske vode i močvare unutar šuma kojima se ne upravlja posebnim zakonom. Šumom se smatraju i sastojine šumskog drveća i žbunja koje su izrasle na poljoprivrednom zemljištu ako su starije od 30 godina i ako njihove krošnje pokrivaju više od 30% zemljišta.

(3) Šumsko zemljište, pored zemljišta obraslog šumom, obuhvata i neobrađeno, neiskorišteno ili neplodno zemljište izvan šume u onom omjeru u kojem obezbjeđuje ili potpomaže funkcije susjedne šume. Šumsko zemljište također sačinjavaju područja sa smanjenim šumskim pokrivačem, krš, čistine i livade unutar šuma.

(4) Šumom se ne smatraju groblja pokrivena drvećem, rasadnici šumskog drveća izvan šuma, izolovane grupe šumskog drveća na površini do 1000 m<sup>2</sup> kao i šumsko drveće i grmlje u urbanim parkovima i drugim naseljenim područjima.

(5) U slučaju sumnje ili spora da li se neko zemljište obraslo šumskim drvećem smatra šumom, odnosno, da li se neko zemljište smatra šumskim zemljištem, odluku donosi Federalni ministar na osnovu prijedloga Federalne uprave za šumarstvo (u daljem tekstu: Federalna uprava), uz pribavljeno mišljenje predstavničkog tijela jedinice lokalne samouprave na čijoj teritoriji se nalazi. Ukoliko se prijedlog Federalne uprave i mišljenje predstavničkog tijela jedinice lokalne samouprave razlikuju,

Federalni ministar će zatražiti ekspertno mišljenje visokoškolske naučno-istraživačke ustanove iz oblasti šumarstva i donijeti konačan stav.

#### **Član 4. (Definicije pojmova)**

(1) Pojmovi koji se koriste u ovom zakonu imaju sljedeća značenja:

1. **Čista sječa** znači sječū svih ili praktično svih stabala u sastojini koja nije u skladu sa dokumentima prostornog uređenja predviđena za promjenu namjene šumskog zemljišta, izlažući taj dio zemljišta ekološkim uslovima goleti čime se stvaraju ozbiljne poteškoće za stanište ili susjedne satojine.
2. **Doznaka** podrazumjeva odabiranje, obilježavanje i evidentiranje stabala za sječū.
3. **Funkcije šuma su:**
  - a) **ekološke:** zaštita diverziteta šumskih ekosistema, zaštita staništa, zaštita zemljišta, zaštita voda, klimatska, uključujući ulogu šuma u vezivanju ugljika iz zraka;
  - b) **socijalne:** nauka, istraživanje, obrazovanje, odbrana, zaštita naselja, objekata i infrastrukture, turizam, rekreacija, pejzažno-estetske funkcije, istorijske funkcije, umjetnost, duhovno-spiritualne funkcije i unaprijeđenje kvaliteta življenja stanovništva.
  - c) **ekonomske:** prihod od proizvodnje drveta i nedrvnih šumskih proizvoda.
4. **Gospodarenje šumama** obuhvata planiranje, uzgajanje, zaštitu i korištenje šuma i šumskog zemljišta u skladu sa odredbama šumskogospodarske osnove;
5. **Gospodarska jedinica** je najmanja prostorna uređajna jedinica šume i šumskog zemljišta na kome se obezbijeduje trajnost gospodarenja.
6. **Izvođač radova u šumarstvu** je fizičko ili pravno lice koje je registrovano za izvođenje radova u šumarstvu te u stalnom radnom odnosu ima uposlenog najmanje jednog diplomiranog inženjera šumarstva/bachelora šumarstva sa odgovarajućom licencom za obavljanje specifičnih poslova u šumarstvu.
7. **Jedinstven cjenovnik šumskih proizvoda** je minimalni cjenovnik koji služi za obračun naknada koje su predviđene ovim Zakonom, te koji služi kao polazna osnova za utvrđivanje tržišnih cijena koje donosi korisnik šuma
8. **Korisnik šuma** je šumsko-privredno društvo koje na osnovu ugovora zaključenog u skladu sa odredbama ovog Zakona i Zakona o obligacionim odnosima obavlja poslove gospodarenja državnim šumama.
9. **Korištenje šume** obuhvata sječū i transport drveta, sabiranje nedrvnih šumskih proizvoda uključujući i prodaju šumskih drvnih sortimenata i nedrvnih šumskih proizvoda.
10. **Krčenje šume** u smislu ovog Zakona je promjena namjene šumskog zemljišta. Izgradnja objekata u šumi i na šumskom zemljištu potrebnih za gospodarenje šumama kao i za prehranu i uzgoj divljači ne smatra se krčenjem.
11. **Krš** je jedinstven oblik reljefa s posebnim hidrogeološkim i geomorfološkim značajkama, u kojem je podzemno vodno oticanje znatno bogatije od nadzemnog, u kojem se površinske razvodnice znatno razlikuju od podzemnih i u kojem se javljaju posebni površinski fenomeni (škrape, ponikve, uvale, polja i dr.) i podzemni oblici (špilje i jame) u tektonski razlomljenim karbonatnim stijenama. Može biti pokriven šumskom vegetacijom ili bez nje (goli krš).
12. **Licenciranje za obavljanje poslova u šumarstvu** obuhvata postupak, uslove i tijela unutar strukovnih udruženja šumarstva u Federaciji nadležna za izdavanje

licenci stručnjacima šumarstva za obavljanje specifičnih poslova u šumarstvu i licima koja obavljaju radove u šumi.

13. **Otvorena vatra** je svaka zapaljena vatra izvan zatvorenog objekta koji je pod krovom i zatvorenim ognjištem.
14. **Pravno lice za obavljanje stručnih poslova u privatnim šumama** je privredno društvo registrovano kod nadležnog suda za poslove šumarstva, koje posjeduje odobrenje Federalnog ministarstva poljoprivrede, vodoprivrede i šumarstva (u daljem tekstu: Federalno ministarstvo) i u stalnom radnom odnosu ima uposlenog najmanje jednog diplomiranog inženjera šumarstva/mastera šumarstva sa odgovarajućom licencom za obavljanje specifičnih poslova u šumarstvu.
15. **Površinske vode** su stalni i povremeni površinski vodeni tokovi, te stajaće vode.
16. **Prava trećih lica** na šume su prava na korištenje šumskih proizvoda koja postoje u skladu sa obligacionim pravom i upisana su u zemljišnoj knjizi.
17. **Pustošenje šuma** podrazumijeva narušavanje stabilnosti šuma, podbjeljivanje stabala, veće oštećivanje stabala i njihovih dijelova, veće uništavanje i oštećivanje podmlatka, kao i svaka druga radnja kojom se slabi prinorna snaga šume i šumskog zemljišta, ugrožava opstanak šume i njihove funkcije.
18. **Sanitarna sječa** znači sječju oboljelih, insektima napadnutih, oštećenih ili izvaljenih stabala.
19. **Šumska infrastruktura** su šumski putevi, stalne šumske vlake, stalne žičare i druge šumske komunikacije i kapaciteti u šumama koji su namijenjeni za gospodarenje šumama.
20. **Šumski proizvodi** su svi proizvodi šuma i šumskog zemljišta, uključujući, ali ne ograničavajući se na:
  - a) šumsko drveće i grmlje;
  - b) biomasu ukupne šumske vegetacije;
  - c) cvjetove, sjeme, koštunjica voće, bobičaste i druge plodove, koru drveta, korijen, šišarke i plodove druge vegetacije unutar šume;
  - d) ljekovito, aromatsko i jestivo bilje i druge biljke i njihove dijelove;
  - e) gljive;
  - f) biljni sok i smola;
  - g) med;
  - h) divljač i ostale životinje koje žive u šumi;
  - i) ribe, puževe i rakove;
  - j) travnati ili pašnjački prekrivač;
  - k) treset, zemlju, pijesak, šljunak i kamen sa površine zemlje.Proizvodi iz al. b) -k) ove tačke predstavljaju nedrvne šumske proizvode.
21. **Šumski putevi** su putevi sa pratećom infrastrukturom, koji su namijenjeni za prijevoz šumskih proizvoda i sav saobraćaj vezan za gospodarenje šumama. Vlake nisu šumski putevi.
22. **Šumski reprodukcioni materijal** je:
  - a) **Sjeme**: šišarke, plodovi i sjeme namijenjeno za proizvodnju biljaka;
  - b) **Dijelovi biljaka**: grančice i snopovi rezanih grana namijenjeni za proizvodnju biljaka;
  - c) **Mlade biljke**: biljke uzgojene iz sjemena ili dijelova biljke, uključujući i mlade biljke iz prirodnog podmlatka.
23. **Šumsko uzgojnim mjerama** se smatraju sve mjere i aktivnosti koje doprinose osnivanju novih sastojina u šumi i poboljšanju njihove stabilnosti, raznolikosti ili kvaliteta.

Šumsko uzgojne mjere uključuju:

- a) **Mjere za obnovu šuma**, odnosno za stvaranje novih sastojina;
  - b) **Njegu šuma u mladim razvojnim fazama**, uključujući proredu mlađih sastojina;
  - c) **Specijalnu njegu** mladih faza u prebornim šumama i drugim raznolikim šumama, izdanačkim šumama, kao i njegu rubova šuma;
  - d) **Rekonstrukciju i konverziju** izdanačkih šuma, makija, šikara i šibljaka.
24. **Trajnost gospodarenja šumama** podrazumjeva korištenje proizvoda šuma i upotrebu šuma i šumskih zemljišta na način i sa intenzitetom koji će očuvati njihov biodiverzitet, proizvodnost, sposobnost obnavljanja, vitalnost te povećati njihov potencijal da sada i u budućnosti obavljaju značajne ekološke, ekonomske i socijalne funkcije na lokalnom i globalnom nivou, a da se pri tom ne ugrozi funkcionisanje drugih ekosistema.
25. **Upravljanje šumama i šumskim zemljištima** podrazumjeva administrativno-upravne poslove Federalne uprave koji se sastoje od kreiranja jedinstvene šumarske politike, dugoročnog (strateškog) i srednjoročnog planiranja, kontrole i stručnog nadzora korištenja šuma i šumskog zemljišta u cilju očuvanja i unaprijeđenja trajnosti gospodarenja šumama.
26. **Vlasnici šume** su pravna i fizička lica koja su na zakonit način stekla pravo vlasništva nad šumom i šumskim zemljištem. Na zakonit način stečena prava na korištenje cijele ili dijelova šume ili šumskog zemljišta, ne smatraju se vlasništvom u smislu ovog Zakona.
27. **Zaštita šuma** je skup mjera i aktivnosti koje su dužni preduzimati vlasnici i korisnici koji gospodare šumama radi zaštite šuma od požara, drugih elementarnih nepogoda, štetnih organizama, bolesti i štetnih antropogenih uticaja.
- (2) Gramatička terminologija korištenja muškog ili ženskog roda podrazumijeva uključivanje oba roda u ovom zakonu i propisima donesenim na osnovu ovog Zakona.
- (3) Pravilnici, evidencije, registri, obrasci, izvještaji i drugi akti nastali temeljem ovog Zakona odražavaće principe ravnopravnosti, te ukoliko sadrže statističke podatke, isti trebaju biti razvrstani po spolu.

## II. PLANIRANJE I PRIVREĐIVANJE U ŠUMARSTVU

### A. Planiranje u šumarstvu

#### Član 5. (Šumarski program Federacije)

(1) Šumarski program Federacije poštujući međunarodnu i domaću legislativu definiše opću politiku šumarstva, gospodarenja šumama i šumskim zemljištima, kao i politiku gospodarenja sa divljači na teritoriji Federacije, orijentisanu u pravcu očuvanja i trajnosti gospodarenja šumama uključujući održavanje i unapređivanje diverziteta šumskih ekosistema.

(2) Šumarski program Federacije sastoji se iz dva dijela:

a) Opći dio, koji određuje glavne ciljeve, principe i smjernice za trajno gospodarenje šumama u Federaciji, na osnovu stvarnog stanja šuma, domaćih i međunarodnih obaveza u vezi sa šumarstvom, uvažavajući međunarodno dogovorene smjernice za trajno gospodarenje šumama;

b) Izvedbeni dio u kome se postavljaju i razrađuju ciljevi utvrđeni Općim dijelom i određuje način njihove realizacije u određenom roku, uključujući finansiranje.

(3) Opći dio Šumarskog programa Federacije donosi Parlament Federacije Bosne i Hercegovine (u daljem tekstu: Parlament Federacije BiH).

(4) Vlada Federacije Bosne i Hercegovine (u daljem tekstu: Vlada Federacije BiH) donosi izvedbeni dio Šumarskog programa Federacije koji predstavlja osnovu za korištenje namjenskih sredstava Budžeta Federacije Bosne i Hercegovine (u daljem tekstu: Budžeta Federacije BiH) i budžeta kantona u skladu sa odredbama ovog Zakona.

(5) Opći dio Šumarskog programa Federacije donosi se za period od 30 godina sa mogućnošću revizije u skladu sa dinamikom realizacije izvedbenog dijela. Izvedbeni dio Šumarskog programa Federacije se donosi za period od pet godina.

(6) Federalno ministarstvo poljoprivrede, vodoprivrede i šumarstva (u daljem tekstu Federalno ministarstvo) putem Federalne uprave za šumarstvo (u daljem tekstu: Federalna uprava) izrađuje nacrt Šumarskog programa Federacije i dostavlja ga Vladi Federacije BiH i Parlamentu Federacije BiH.

(7) Federalni ministar poljoprivrede, vodoprivrede i šumarstva (u daljem tekstu Federalni ministar) imenuje Savjet za pripremu i provođenje aktivnosti na izradi nacrta Šumarskog programa Federacije.

## **Član 6.** **(Kantonalni šumsko-razvojni plan)**

(1) Kantonalni šumsko-razvojni plan izrađuje se svakih deset godina za sve šume i šumsko zemljište, bez obzira na vlasništvo s ciljem da se obezbijedi trajnost gospodarenja šumama na području kantona.

(2) Pored smjernica iz Šumarskog programa Federacije kantonalni šumsko-razvojni plan uvažava smjernice za gospodarenje prirodnim i kulturnim nasljeđem u šumama i na šumskom zemljištu, uslove za gospodarenje vodama, kao i potrebe razvoja lokalne zajednice.

(3) Kantonalni šumsko-razvojni plan sadrži najmanje sljedeće:

- a) kartu sa ucrtanim granicama šuma i šumskog zemljišta, granicama šumskoprivrednih područja i gospodarskih jedinica, uzimajući u obzir granice općina i kategoriju nosioca prava na šumama;
- b) procjenu funkcija šuma i njihov uticaj na okoliš;
- c) klasifikaciju šuma po površinama, prema njihovim funkcijama i prirodnim karakteristikama, a koje se posebno odnose na stanište;
- d) procjenu drvene zalihe i njenog kvaliteta, prirasta, podmlađivanja, biodiverziteta i zdravstvenog stanja;
- e) smjernice za gospodarenje šumama različitih gazdinskih klasa i kategorija šuma;
- f) otvorenost šuma sa planom izgradnje novih šumskih puteva;
- g) smjernice za pošumljavanje šumskog zemljišta;
- h) procjenu ugroženosti šuma od požara, određenu po stepenu opasnosti i smjernice za zaštitu šuma od požara;
- i) smjernice za korištenje nedrvnih šumskih proizvoda;
- j) smjernice za lovstvo i gospodarenje divljači;
- k) program bioloških i tehničkih investicija i rentabilnost radova.

(4) Kod izrade kantonalnog šumsko-razvojnog plana koriste se podaci iz šumsko privrednih osnova.

(5) Vlada kantona donosi kantonalni šumsko-razvojni plan, a kantonalno ministarstvo nadležno za poslove šumarstva (u daljem tekstu: kantonalno ministarstvo) je odgovorno za njegovu pripremu, izradu i realizaciju.

(6) Kantonalno ministarstvo je dužno prilikom izrade plana zatražiti od svih zainteresovanih strana a posebno od zainteresiranih jedinica lokalne samouprave da daju svoje prijedloge i mišljenja..

(7) Kantonalno ministarstvo prije donošenja kantonalnog šumsko-razvojnog plana pribavlja saglasnost Federalnog ministarstva, o njegovoj usklađenosti sa Šumarskim programom Federacije.

(8) Kantonalna ministarstva dužna su trajno čuvati kantonalni šumsko-razvojni plan .

## **Član 7. (Inventura šuma)**

(1) Radi utvrđivanja i praćenja stanja, provodi se inventura šuma na velikim površinama. Inventura šuma na velikim površinama vrši se kontinuirano svakih deset godina, a provodi je Federalno ministarstvo.

## **Član 8. (Šumsko privredno područje)**

(1) U cilju obezbjeđenja racionalnog i trajnog gospodarenja državnim šumama i šumskim zemljištima formira se šumsko privredno područje u koje ulaze i površine krša kao posebne gospodarske jedinice.

(2) Šumsko privredna područja predstavljaju u geografskom, prometnom, ekološkom i ekonomskom pogledu jednu zaokruženu cjelinu u okviru koje se osigurava trajnost gospodarenja šumskim ekosistemima.

(3) U administrativnim granicama jednog kantona može se formirati jedno ili više šumsko privrednih područja.

(4) Šumsko privredna područja dijele se na gospodarske jedinice

(5) Formiranje šumsko privrednih područja zasniva se na stručnom elaboratu koji pored prijedloga sa obrazloženjem i bioloških, tehničkih i ekonomskih pokazatelja sadrži opšte kriterije a naročito:

- a) preglednu kartu područja sa ucrtanim izohipsama, vanjskim granicama šumsko privrednog područja, granicama unutrašnje podjele šuma po gospodarskim jedinicama i odjeljenjima, ucrtanom mrežom trajnih šumskih puteva, izvorištima i vodotocima, objektima koji su od značaja za gospodarenje šumama i opis granica šumsko privrednih područja;
- b) popis katastarskih parcela po katastarskim općinama i zemljišnoknjižnim ulošcima, sa kulturama, klasama i površinama koje ulaze u šumsko gospodarsko područje;
- c) podatke o drvnj zalihi po gospodarskim jedinicama, kategorijama šuma i vrstama drveća;
- d) ukupan godišnji zapreminski prirast po kategorijama šuma i vrstama drveća;
- e) prosječan godišnji etat po kategorijama šuma i vrstama drveća;
- f) procjenu prihoda i rashoda gospodarenja šumama i šumskim zemljištima u okviru šumsko gospodarskog područja;
- g) podatke o mogućnostima korištenja nedravnih šumskih proizvoda, divljači, turizma, sporta i rekreacije;
- h) prikaz podataka iz tač. c), d), e), f) i g) stava 5. ovog člana po općinama.

(6) Odluku o formiranju šumsko privrednih područja ili reviziji njihovih granica donosi Vlada Federacije BiH na prijedlog Federalnog ministarstva i na osnovu

stručnog elaborata iz stava 5, ovog Člana. Zahtjev za formiranje šumsko privrednih područja ili reviziju njihovih granica može podnijeti kantonalno ministarstvo, jedinica lokalne samouprave, šumsko privredno društvo i Federalna uprava.

(7) Stručni elaborat iz stava 5, ovog Člana izrađuje visokoškolska naučno-istraživačka ustanova iz oblasti šumarstva a troškove njegove izrade snosi podnosilac zahtjeva za formiranje šumsko privrednih područja ili reviziju njihovih granica

(8) Opšte kriterije za formiranje šumsko privrednih područja utvrđuje Vlada Federacije na prijedlog Federalnog Ministra.

## **Član 9.** **(Šumsko privredna osnova)**

(1) Šumama na prostoru jednog šumsko privrednog područja se gospodari po odredbama šumsko privredne osnove, godišnjeg plana gospodarenja i projekta za izvođenje. Odredbe šumsko privredne osnove su obavezne. Šumsko privredna osnova mora biti usklađena sa smjernicama Šumarskog programa Federacije i kantonalnim šumsko-razvojnim planom.

(2) Šumsko privredna osnova, prostorni plan, vodoprivredna osnova, lovno privredna osnova, evidencije koje se vode u Zavodu za zaštitu kulturno historijskog i prirodnog naslijeđa i federalni program upravljanja mineralnim resursima te planovi korištenja pojedinih mineralnih sirovina moraju biti međusobno usklađeni.

(3) Izuzev od odredaba stava 1. ovog člana, ako ne postoje objektivne mogućnosti pravovremene izrade nove šumsko privredne osnove, državnim i privatnim šumama može se gospodariti najduže godinu dana na osnovu godišnjeg plana gospodarenja za koji je postupak donošenja isti kao i za šumsko privredne osnove. Odredbe godišnjeg plana gospodarenja su obavezne. Godina izvršenja godišnjeg plana gospodarenja smatra se godinom izvršenja nove šumsko privredne osnove.

(4) Ukupan obim sječa predviđen šumsko privrednom osnovom za uređajni period, po vrstama drveća i gazdinskim klasama, ne može se prekoračiti. Od ukupno planirane količine sječe za uređajni period za visoke šume sa prirodnom obnovom, u okviru šumsko privrednog područja godišnje se realizuje prosječna godišnja količina.

(5) Kada se u jednoj ili više proteklih godina uređajnog perioda realizuje manje od predviđenog godišnjeg obima sječe u okviru šumsko privrednog područja, može se u narednim godinama uređajnog perioda realizovati preostali dio količine sječe.

(6) Šumsko privredna osnova za državne šume donosi se za šume u granicama jednog šumsko privrednog područja, a za privatne šume donosi se jedinstvena osnova za sve šume jedne općine.

(7) Vlasnik svih dokumenata u elektronskoj i drugoj formi izrađenih/pripremljenih tokom izrade šumsko privredne osnove za državne šume je Vlada Federacije BiH a za privatne šume Vlada Federacije BiH i vlasnici šuma, što uključuje sve:

- pisane dokumente;
- tabelarne podatke baze podataka i GIS baze podataka;
- GIS podatke i karte (vektorizirane, georeferencirane, geokodirane) uz potrebne prateće dokumente (vektore i sl.).

(8) Elektronski i ostali dokumenti izrađeni/pripremljeni tokom izrade šumsko privrednih osnova, deponuju se i čuvaju u Federalnoj upravi a pravo korištenja ovih



podataka ima kantonalno resorno ministarstvo, jedinica lokalne samouprave na čijoj teritoriji se nalaze šume, vlasnici i korisnici šuma.

(9) Svi digitalni podaci moraju biti dostavljeni vlasniku u obliku koji mu omogućuju da ih koristi u analitičke i druge svrhe.

(10) Bilo kakva komercijalna i druga upotreba gore pomenutih podataka/dokumenata nije dozvoljena bez saglasnosti vlasnika.

(11) Šumsko privredna osnova izrađuje se za period od deset godina.

## **Član 10.**

### **(Izrada i donošenje šumsko privredne osnove)**

(1) Šumsko privrednu osnovu može izrađivati pravno lice koje je registrovano za te poslove uz prethodno pribavljenu saglasnost Federalnog ministarstva. Za poslove izrade šumsko privredne osnove može se registrovati pravno lice koje u stalnom radnom odnosu ima najmanje pet diplomiranih inženjera šumarstva/mastera šumarstva i to po jednog za: uzgajanje šuma, zaštitu šuma, uređivanje šuma, iskorištavanje šuma i šumarsku ekonomiku, politiku i organizaciju sa odgovarajućom licencom za obavljanje specifičnih poslova u šumarstvu. Federalno ministarstvo svake četiri godine vrši reviziju izdatih saglasnosti pravnim licima za izradu osnova.

(2) Nadzor nad prikupljanjem podataka šumsko privredne osnove i provjera njihove tačnosti su obavezni i može ih vršiti pravno lice registrovano u skladu sa stavom 1. ovog člana ili visokoškolska naučno-istraživačka ustanova iz oblasti šumarstva, uz prethodno pribavljenu saglasnost Federalnog ministarstva. Federalno ministarstvo svake četiri godine vrši reviziju izdatih saglasnosti za vršenje nadzora nad prikupljanjem podataka za izradu osnova i provjeru njihove tačnosti

(3) Šumsko privredne osnove za sve šume donosi Federalna uprava uz pribavljeno mišljenje zainteresiranih jedinica lokalne samouprave i resornog kantonalnog ministarstva a za privatne šume i vlasnika privatnih šuma. Traženo mišljenje sa stručnim obrazloženjem zainteresirane strane su dužne dostaviti Federalnoj upravi najkasnije u roku od 30 dana od dana prijema zahtjeva. Šumsko privredne osnove se ne mogu primjenjivati prije nego ih odobri Federalno ministarstvo. Osnova na koju je data saglasnost Federalnog ministarstva smatra se usaglašenom sa dokumentima iz sektora vodoprivrede i nije ih potrebno pribavljati.

(4) Poslove izrade šumsko privredne osnove za sve šume finansira Federalna uprava i odgovorna je za njihovu pravovremenu izradu. Federalna uprava je dužna najmanje 60 dana prije isteka roka važnosti šumsko privredne osnove, dostaviti dva primjerka novoizrađene osnove sa pribavljenim mišljenjima iz stava (3) ovog člana Federalnom ministarstvu radi provođenja postupka njenog odobravanja.

(5) Nadzor nad izradom šumsko privredne osnove vrši Federalna uprava. Propuste u izradi i nedostatke šumsko privredne osnove utvrđene od strane Federalne uprave, dužno je otkloniti o svom trošku pravno lice kojem je povjerena izrada šumsko privredne osnove.

## **Član 11.**

### **(Sadržaj šumsko privredne osnove)**

(1) Šumsko privredna osnova za državne šume obavezno sadrži:

**a) uvodni** dio sa razlozima za donošenje i popisom svih katastarskih parcela koje ulaze u šumsko privredno područje;

- b) stanje šuma i šumskih zemljišta u doba uređivanja uključujući i zaštićena šumska područja, objekte, rijetke vrste flore i faune, hidrološke, geomorfološke i arheološke znamenitosti;
- c) analizu i ocjenu gospodarenja u proteklom uređajnom periodu;
- d) plan gospodarenja šumama i šumskim zemljištima za naredni uređajni period sa:
- (1) planom sječa,
  - (2) planom šumsko uzgojnih radova,
  - (3) planom proizvodnje i tehnologije rada,
  - (4) planom zaštite šuma,
  - (5) planom za očuvanje i unapređenje diverziteta šumskih ekosistema, ekoloških i socijalnih funkcija šume,
  - (6) planom investicionih ulaganja sa posebnim naglaskom na održavanje i izgradnju šumske transportne infrastrukture
  - (7) planom korištenja nedravnih proizvoda šuma.
- e) ekonomsko finansijsku analizu koja sadrži:
- (1) rekapitulaciju i obračun očekivanih prihoda i rashoda na osnovu planova iz tačke d) ovog stava.
  - (2) utvrđenu proizvodnu vrijednost šuma i šumskih zemljišta kao osnove za određivanje visine naknade za korištenje šuma.
- (2) Ako postoje objektivni razlozi za odstupanje od odredaba šumsko privredne osnove, naročito zbog prirodnih nepogoda ili bitno promijenjenih gospodarskih uslova, potrebno je izvršiti njenu reviziju. Reviziju odobrava i potvrđuje Federalno ministarstvo i jedan primjerak se dostavlja nadležnom šumarskom inspektoratu.
- (3) Federalni ministar donosi pravilnik kojim se propisuju elementi za izradu, postupak donošenja i reviziju šumsko privrednih osnova za državne i privatne šume.

## **Član 12.**

### **(Godišnji planovi realizacije šumsko privredne osnove)**

- (1) Šumsko privredna osnova se realizuje godišnjim planovima realizacije koji sadrže prosječno jednu desetinu svih planiranih radova po osnovi.
- (2) Sastavni dio godišnjeg plana realizacije šumsko privredne osnove su projekti za izvođenje svih planiranih radova.
- (3) Saglasnost na godišnji plan realizacije šumsko privredne osnove, koji je korisnik šuma dužan dostaviti nakasnije do 30.11. tekuće za narednu godinu, daje Federalna uprava uz prethodno pribavljeno mišljenje jedinica lokalne samouprave na čijem području će se izvoditi radovi predviđeni godišnjim planom u roku od 30 dana od dana prijema plana.
- (4) Radovi predviđeni godišnjim planom realizacije šumsko privredne osnove ne mogu se započeti bez saglasnosti Federalne uprave. U toku godine, ukoliko za to postoje opravdani razlozi može se izvršiti izmjena godišnjeg plana na način kako je to predviđeno stavom (3) ovog Člana.
- (5) Usvojeni godišnji plan realizacije šumsko privredne osnove korisnik šuma je dužan u roku od 15 dana od dana usvajanja dostaviti Federalnoj upravi, federalnoj i kantonalnoj šumarskoj inspekciji i jedinici lokalne samouprave na čijem području će se izvoditi radovi predviđeni godišnjim planom.

### **Član 13. (Projekat za izvođenje)**

(1) Projekat za izvođenje se izrađuje za uređajnu jedinicu – odjel za državne šume i katastarsku parcelu/parcele za privatne šume u skladu sa godišnjim planom realizacije šumsko privredne osnove. Odredbe projekta za izvođenje su obavezne.

(2) Projekat za izvođenje sadrži planove svih potrebnih biotehničkih mjera u okviru pojedinih sastojina unutar odjeljenja a u skladu sa predviđenim ciljevima gazdovanja i to: plan sječa, plan šumsko-uzgojnih radova, plan korištenja i transporta posječene drvene mase, finansijsko-ekonomsku analizu realizacije projekta i kartu unutrašnjeg prostornog uređenja odjeljenja. Pored planova, projekat za izvođenje sadrži procjenu uticaja radova na okoliš u skladu sa članom 33 ovog zakona i mjere zaštite na radu i protivpožarne zaštite.

(3) Radovi predviđeni projektom treba da se izvrše u roku od dvije godine od dana njegovog donošenja.

(4) Projekat za izvođenje mogu izrađivati diplomirani inženjeri šumarstva/masteri šumarstva sa odgovarajućom licencom za obavljanje specifičnih poslova u šumarstvu. Korisnik šuma, odnosno privatni vlasnik šume, određuje lice za izradu projekta.

(5) Projekat za izvođenje donosi korisnik šuma za državne šume, a za privatne šume Federalna uprava ili pravno lice za obavljanje stručnih poslova u privatnim šumama.

(6) Izuzev od stava 1. ovog člana projekat za izvođenje može se izrađivati za više odjela u jednom slivu ako sječa i izrada sanitarnih užitaka ne prelazi više od 100 m<sup>3</sup> po jednom odjelu.

(7) Za privatne šume rade se projekti za šumsko-uzgojne radove kao i za sječu ako je godišnji obim sječa veći od 100 m<sup>3</sup> po vlasniku .

(8) Korisnik šuma određuje realizatora projekta, diplomiranog inženjera šumarstva/bachelora šumarstva sa odgovarajućom licencom za obavljanje specifičnih poslova u šumarstvu, koji je odgovoran za stručno izvođenje radova po projektu za izvođenje.

(9) Projekat za izvođenje ima trajan karakter i čuva se u arhivi korisnika šuma i vlasnika privatnih šuma.

(10) Korisnik šuma i vlasnici privatnih šuma dužni su da vode registar izrađenih i donesenih projekata za izvođenje i da sve izvršene radove po projektu evidentiraju u odgovarajuće evidencije.

## **B. Privređivanje u šumarstvu**

### **Član 14. (Doznaka stabala za sječu)**

(1) Doznaka stabala za sječu vrši se obilježavanjem stabala ili obilježavanjem površina obraslih drvećem. Obilježavanje površina za sječu može se vršiti samo u izdanačkim šumama predviđenim za direktnu konverziju u viši uzgojni oblik.

(2) Doznaku stabala za sječu u državnim šumama može vršiti diplomirani inženjer šumarstva/master šumarstva sa odgovarajućom licencom za obavljanje specifičnih poslova u šumarstvu koga odredi korisnik šuma. Izuzetno od odredbe ovog stava doznaku stabala za sanitarnu sječu i doznaku stabala u izdanačkim šumama može vršiti bachelor šumarstva/šumarski tehničar sa odgovarajućom licencom za obavljanje specifičnih poslova u šumarstvu koga odredi korisnik šuma.

(3) Doznaka i sječa stabala ne može se vršiti u dijelovima šume za koje imovinsko-pravni odnosi nisu riješeni, granice nisu utvrđene i na terenu vidno i na propisani način obilježene.

(4) Doznaka stabala za sječū i obim šumsko-uzgojnih radova u privatnim šumama vrši se na osnovu rješenja Federalne uprave.

(5) Doznaka i sječa stabala, odnosno površina za sječū, može se odobriti samo vlasniku koji pribavi i podnese dokaze o pravu vlasništva.

(6) Protiv rješenja iz stava 4. ovog člana može se izjaviti žalba Federalnom ministarstvu u roku od osam dana od dana prijema istog.

(7) Doznaku stabala ili obilježavanje površina za sječū u privatnim šumama može vršiti diplomirani inženjer šumarstva/master šumarstva sa odgovarajućom licencom za obavljanje specifičnih poslova u šumarstvu kojeg rješenjem odredi Federalna uprava ili pravno lice za obavljanje stručnih poslova u privatnim šumama. Izuzetno od odredbe ovog stava doznaku stabala za sanitarnu sječū i doznaku stabala u izdavačkim šumama, u privatnim šumama može vršiti bačelor šumarstva/šumarski tehničar sa odgovarajućom licencom za obavljanje specifičnih poslova u šumarstvu koga rješenjem odredi Federalna uprava ili pravno lice za obavljanje stručnih poslova u privatnim šumama.

(8) Federalni ministar donosi pravilnik kojim se propisuje način doznake i obilježavanja površina za sječū.

## **Član 15. (Sječa šuma)**

(1) Stabla u šumi mogu se sjeći tek poslije izvršene doznake, izrade projekta za izvođenje i obavještanja Federalne uprave i jedinice lokalne samouprave na čijem se području vrši sječa.

(2) Šteta koja nastane prilikom sječe na šumskom zemljištu mora biti sanirana odmah nakon završetka izvlačenja šumskih drvnih sortimenata.

(3) Ukoliko postoji opravdan razlog za sumnju da je planirana ili započeta sječa, ili druge radnje u suprotnosti sa šumsko privrednom osnovom, godišnjim planom realizacije šumsko privredne osnove, ovim Zakonom ili propisima koji su doneseni na osnovu ovog Zakona, nadležni šumarski inspektor može zabraniti izvođenje radova dok se ne otklone utvrđene nepravilnosti.

## **Član 16. (Biološka reprodukcija šuma)**

(1) Korisnik državnih šuma i vlasnik/predstavnik vlasnika za privatne šume dužni su izvršavati poslove biološke reprodukcije šuma u minimalnom obimu koji je predviđen šumsko privrednom osnovom.

(2) Biološka reprodukcija šuma u smislu ovog Zakona podrazumjeva:

- a) pripremu zemljišta za prirodno podmlađivanje,
- b) pošumljavanje i sjetva sjemenom šumskog zemljišta,
- c) popunjavanje, njegu i čišćenje šumskih kultura,
- d) proizvodnju šumskog sjemena i šumskog sadnog materijala,
- e) prorjeđivanje sastojina,
- f) sanaciju požarišta,
- g) prevođenje degradiranih sastojina u viši uzgojni oblik,

- h) doznaku stabala za sječu,
- i) rekonstrukciju i konverziju izdanačkih šuma, makija, šikara i šibljaka,
- j) zaštitu šuma,
- k) certificiranje gospodarenja šumama
- l) projektovanje, izgradnju, rekonstrukciju i održavanje šumske infrastrukture.

(3) Planirani obim biološke reprodukcije šuma u šumsko privrednim osnovama mora biti usklađen sa Izvedbenim dijelom Šumarskog programa Federacije i kantonalnim šumsko-razvojnim planom.

### **Član 17. (Tehnički prijem radova)**

(1) Za izvedene radove po projektu za izvođenje vrši se tehnički prijem radova, a najkasnije u roku od tri mjeseca od okončanja radova.

(2) Komisiju za tehnički prijem radova u državnim šumama formira korisnik šuma, a za privatne šume Federalna uprava ili pravno lice za obavljanje stručnih poslova u privatnim šumama.

(3) Komisija za tehnički prijem radova sastoji se od najmanje tri člana u koju obavezno ulaze diplomirani inženjer šumarstva/master šumarstva koji je izradio projekat za izvođenje radova i jedan diplomirani inženjer šumarstva/master šumarstva predstavnik Federalne uprave sa odgovarajućom licencom za obavljanje specifičnih poslova u šumarstvu. Realizator projekta ne može biti član komisije.

(4) Tehnički prijem radova pošumljavanja vrši se poslije dvije godine od završetka njihovog izvođenja.

(5) Ako se prilikom tehničkog prijema utvrdi da radovi nisu izvršeni u skladu sa projektom za izvođenje, izvođač radova je dužan utvrđene nedostatke otkloniti i radove izvršiti u roku koji odredi komisija. Nakon isteka roka komisija vrši ponovni pregled.

(6) O izvršenom tehničkom prijemu izvedenih radova, komisija sačinjava zapisnik u kojem se obavezno konstatuje uspjeh, obim i kvalitet izvršenih radova po projektu za izvođenje.

(7) Primjerak zapisnika komisije dostavlja se u roku od osam dana od dana završetka pregleda nadležnom šumarskom inspektoratu.

(8) Svi izvršeni radovi i nalaz komisije evidentiraju se u propisane knjige evidencije.

### **Član 18. (Obavljanje radova u šumarstvu)**

(1) Radove u šumi mogu izvoditi samo lica sa odgovarajućom licencom za obavljanje specifičnih poslova u šumarstvu

(2) Pravna lica koja obavljaju poslove u šumama dužna su obezbijediti mjere zaštite na radu u skladu sa propisima iz oblasti zaštite na radu i protivpožarne zaštite i obavezna su sprovesti adekvatnu obuku zaposlenih.

(3) Federalni ministar donosi pravilnik kojim se propisuju uslovi koje moraju ispunjavati izvođači radova u šumarstvu.

**Član 19.**  
**(Licenciranje za obavljanje poslova u šumarstvu)**

- (1) Licenciranjem za obavljanje poslova u šumarstvu osigurava se potreban nivo kvaliteta kadrova na svim nivoima za obavljanje specifičnih poslova i radova u šumarstvu za koje je ovim Zakonom propisano licenciranje.
- (2) Sva lica koja posjeduju odgovarajući stepen formalne stručne spreme imaju pravo na licenciranje za obavljanje poslova u šumarstvu.
- (3) Licenciranja su oslobođeni šumarski stručnjaci i lica koja obavljaju radove u šumi sa više od 10 godina radnog iskustva u struci, od toga minimalno 5 godina na specifičnim poslovima u šumarstvu za koje se traži licenca, magistri i doktori šumarskih nauka iz oblasti za koju je potrebna licenca za obavljanje specifičnih poslova u šumarstvu
- (4) Postupak licenciranja provodi posebno stručno tijelo u sastavu strukovnih udruženja šumarstva u Federaciji. Stručno tijelo se sastoji od dokazanih i kvalifikovanih stručnjaka iz reda javne šumarske administracije, naučnih i obrazovnih institucija iz oblasti šumarstva i šumsko privrednih društava. Sastav stručnog tijela za licenciranje poslova u šumarstvu predlažu strukovna udruženja šumarstva u Federaciji a saglasnost na isti daje Federalni ministar.
- (5) Federalni ministar donosi pravilnik kojim se propisuje postupak, uslovi sticanja i održanja licence, vođenje registra izdatih licenci i ostala pitanja u vezi provođenja postupka licenciranja za obavljanje poslova u šumarstvu

**Član 20.**  
**(Zabrana čistih sječa i drugih oblika pustošenja šuma)**

- (1) Nisu dozvoljene čiste sječe i drugi oblici pustošenja šuma.
- (2) Čiste sječe mogu biti izvršene u posebnim slučajevima u pripremi šumsko uzgojnih zahvata s ciljem unapređenja šumskih sastojina u mjeri koja je planirana šumsko privrednom osnovom.
- (3) Čista sječa šuma može se primjeniti ako je neophodna zbog sanitarnih razloga ili provođenja preventivnih zaštitnih mjera uz odobrenje Federalne uprave.

**Član 21.**  
**(Pošumljavanje sječina i paljika)**

- (1) Sve površine nastale čistom sječom i paljike moraju biti pošumljene u roku od dvije godine nakon sječe ili šumskog požara, prirodnom obnovom ili putem pošumljavanja.
- (2) Ako se ne očekuje prirodna obnova u roku od dvije godine, koja bi bila u skladu sa šumsko uzgojnim ciljem, pošumljavanje se vrši sadnjom ili sjetvom

(koristeći zdrave sadnice ili sjeme) vrstama drveća koje odgovaraju staništu. U svrhu pošumljavanja koristi se samo materijal za reprodukciju potvrđenog porijekla.

(3) Površine predviđene za pošumljavanje i prirodnu obnovu moraju biti obilježene na terenu i ucrtane na karti odgovarajuće razmjere.

## **Član 22.** **(Šumski materijal za reprodukciju)**

(1) Federalna uprava, na prijedlog korisnika šuma, određuje regije provenijencije, odabire šumske sjemenske objekte i sastojine iz kojih se obezbjeđuje reprodukcioni materijal, vodi registar o šumskim sjemenskim objektima i sastojinama i izdaje potvrde o porijeklu šumskog reprodukcionog materijala.

(2) Doradivači šumskog sjemena i proizvođači šumskog sadnog materijala prate i obavještavaju kupce o kategoriji šumskog reprodukcionog materijala kao i njegovom porijeklu. Nadležni šumarski inspektor nadgleda promet šumskog sjemena i šumskog sadnog materijala.

(3) Uvoz šumskog reprodukcionog materijala moguć je samo na osnovu rješenja kojim se odobrava uvoz, koju izdaje Federalno ministarstvo uz mišljenje Federalne uprave. Rješenje se izdaje samo ako je šumski reprodukcioni materijal potvrđenog porijekla i ako ga trenutno nema na domaćem tržištu ili ako služi u naučno-istraživačke svrhe.

(4) Federalna uprava vodi registre objekata za proizvodnju i doradu šumskog sjemena i sadnog materijala šumskog i hortikulturnog drveća i grmlja.

## **C. Zaštita protiv biotičkih i nebiotičkih agensa**

### **Član 23.** **(Opšte preventivne mjere)**

(1) Opšte dugoročne preventivne mjere protiv biotičkih i nebiotičkih agensa, koji bi mogli ugroziti stabilnost šuma i njihove funkcije, zasnivaju se na gospodarenju šumama, koje uvažava prirodne procese, kao i na održavanju i odgovarajućem unapređenju diverziteta šumskih ekosistema.

(2) Principi i mjere kojima se obezbjeđuje trajnost gospodarenja šumama i održavanje i unapređenje diverziteta šumskih ekosistema određuju se u Šumarskom programu Federacije, a detaljnije se razrađuju u šumsko privrednim osnovama

(3) Staništa od posebnog značaja posmatrana sa gledišta diverziteta šumskih ekosistema koja su određena u šumsko privrednim osnovama moraju biti očuvana.

### **Član 24.** **(Sanitarne sječe, šumski red i druge preventivne mjere)**

(1) Korisnik šuma i vlasnici privatnih šuma provode ili obezbjeđuju provođenje sanitarne sječe prije nego što bi se šume mogle ugroziti prekomjernim razmnožavanjem insekata, širenjem uzročnika biljnih bolesti ili drugih štetnih organizama. U privatnim šumama Federalna uprava mora obezbijediti sanitarne sječe ukoliko vlasnici šuma ne mogu sami provesti sanitarnu sječu.

(2) Mrtva i zaražena neposječena stabla, pojedinačna ili u malim grupama, ne moraju biti posječena u kontekstu sanitarne sječe ako se mogu smatrati obogaćenjem šumskog biodiverziteta i ne predstavljaju ozbiljnu prijetnju sastojinama.

Korisnik šuma i vlasnici privatnih šuma koji su odgovorni da obezbijede sanitarnu sječu i nadležni šumarski inspektor mogu tražiti mišljenje od Federalne uprave ukoliko nije jasan stepen opasnosti.

(3) Korisnik šuma i vlasnik privatnih šuma obezbjeđuju izvođenje sljedećih mjera zaštite šuma:

- a) postavljanje, osmatranje i održavanje feromonskih klopki i postavljanje lovnih stabala za potkornjake;
- b) sanaciju šumskih područja nakon elementarnih nepogoda i prenamnoženja štetočina;
- c) guljenje kore ili tretiranje panjeva i drugih dijelova drveta četinara i brijesta koje predstavlja poseban rizik za razmnožavanje parazita, širenja uzročnika biljnih bolesti i štetočina kroz upotrebu kemijskih sredstava za tretiranje u skladu sa ovim zakonom;
- d) uspostavljanje i održavanje šumskog reda.

(4) Pod šumskim redom iz stava 3. tačka d) ovog člana smatra se preduzimanje mjera za sprječavanje pojave požara, štetnih insekata i biljnih bolesti, štetnog djelovanja vjetra, snijega i drugih nepogoda, oštećivanje stabala i podmlatka i zagađivanja voda prilikom sječe i izvoza drveta.

(5) Federalna uprava

- a) prikuplja sve podatke značajne za zaštitu šuma koje odgovorna lica iz stava 3. ovog člana dostavljaju u roku koji odredi Federalna uprava;
- b) obezbjeđuje informacije o pojavi biljnih bolesti i štetočina;
- c) savjetuje o pitanjima koja se tiču integralne zaštite šuma.

(6) Federalni ministar naređuje dodatne mjere za zaštitu šume ako Federalna uprava ustanovi da je biološka ravnoteža poremećena do takvog stepena da nije moguća njena obnova sa mjerama propisanim u ovom članu ili ako postoji opasnost od drugog velikog oštećenja.

(7) Rad u šumama mora biti izveden u odgovarajućoj sezoni, na način koji smanjuje pojavu šteta po šumski ekosistem.

(8) Federalni ministar donosi pravilnik kojim se propisuje obim mjera za uspostavljanje i održavanje šumskog reda i način njihovog provođenja.

## **Član 25.**

### **(Obnova šuma nakon nepogode)**

(1) U slučaju nepogode u šumi uzrokovane bilo kojim biotičkim ili nebiotičkim uticajima, uključujući i šumske požare, korisnici šuma u saradnji sa Federalnom upravom, pripremaju plan za obnovu oštećenih i uništenih šuma i šumskog zemljišta. Plan sadrži opis nepogode, stepen oštećenja šume, mjere koje se trebaju provesti i troškove sanacije i obnove.

(2) Ako troškovi za obnovu iz stava (1) ovog člana prelaze finansijski potencijal korisnika/vlasnika šuma u kombinaciji sa dostupnim finansijskim sredstvima za šume iz Budžeta Federacije BiH, budžeta kantona i budžeta jedinice lokalne samouprave, Vlada Federacije BiH će obezbijediti posebna sredstva kako bi se omogućila primjena plana.



## **D. Promet drveta i nedrvnih šumskih proizvoda**

### **Član 26. (Promet drveta i nedrvnih šumskih proizvoda)**

(1) Drvo, dijelove stabala i grane posječene u šumi i izvan šume (na poljoprivrednom zemljištu, međama, pojedinačna stabla i sl.), nije dozvoljeno pomjerati od panja dok se ne obilježi šumskim čekićem (žigoše), obrojči, premjeri i evidentira. Zabranjeno je iste stavljati u promet dok se ne izda otpremni iskaz.

(2) Žigosanje, obrojčavanje, premjeravanje, evidentiranje i izdavanje otpremnog iskaza za drvo koje potiče iz državne šume vrši korisnik šuma, a za drvo iz privatnih šuma Federalna uprava ili pravno lice za obavljanje stučnih poslova u privatnim šumama.

(3) Nedrvne šumske proizvode iz člana 38. ovog Zakona nije dozvoljeno stavljati u promet bez odobrenja korisnika šuma ili vlasnika privatne šume.

(4) Pod prometom drveta i nedrvnih šumskih proizvoda, u smislu ovog Zakona, podrazumjeva se prevoz prometnicama, kupovina, prodaja, poklon, skladištenje kao i primanje drveta u prerađivačke kapacitete u kojima se vrši prerada drveta.

(5) Licu koje se zatekne u izvršenju radnji suprotno odredbama ovog člana ili koje izvrši sječu šume na uzurpiranom državnom i zemljištu na kome imovinsko pravni odnosi nisu riješeni i lice koje izvrši sječu bez prethodne doznake i prije žigosanja, obrojčavanja i snabdijevanja drveta sa otpremnim iskazom i koje stavi u promet nedrvne šumske proizvode u suprotnosti sa odredbama ovog člana, kaznit će se novčanom kaznom i izreći će se zaštitna mjera oduzimanja drveta, odnosno nedrvnih šumskih proizvoda, kao i sredstava kojim je izvršena nezakonita radnja, a licu koje dozvoli vršenje radnji suprotno odredbama ovog člana izreći će se novčana kazna.

(6) Privremeno oduzimanje drveta i nedrvnih šumskih proizvoda (zapljena) koji su stavljeni u promet u suprotnosti sa odredbama ovog člana vrše čuvari šuma, pripadnici policije i nadležni šumarski inspektori, dok privremeno oduzimanje sredstava kojima je izvršena nezakonita radnja vrše pripadnici policije u skladu sa važećim propisima koji se odnose na krivičnu, odnosno prekršajnu odgovornost. Privremeno oduzeti šumski proizvodi pohranjuju se na mjestu koje odredi Federalna uprava. U slučaju da postoji mogućnost da se u toku pohranjivanja šumskim proizvodima ili sredstvima umanju vrijednost, zaplijenjenu robu licitacijom će prodati Federalna uprava, a finansijska sredstva deponovati na poseban račun Federalne uprave.

(7) Lica iz stava 6. ovog člana imaju pravo legitimisati sva lica koja se kreću na području šume koju čuvaju, odnosno nad kojom vrše nadzor.

(8) U periodu vegetacije, od 1. aprila do 1. novembra, drvo četinara i brijesta ne može se sa korom stavljati u promet i uskladištavati.

(9) Izuzetno od stava 8. ovog člana drvo četinara i brijesta može se sa korom stavljati u promet ako period od sječe do otpreme traje kraće od ciklusa razvoja insekta, a najduže 21 dan.

(10) Federalni ministar u saradnji sa federalnim ministrom trgovine donosi pravilnik kojim se propisuje način žigosanja, obrojčavanja, premjeravanja, sadržaj i način izdavanja otpremnog iskaza za drvo, koje potiče iz državnih i privatnih šuma sa teritorije Federacije, kao i način vođenja evidencija, obilježavanja i izdavanja

dokumentacije za drvene sortimente u unutrašnjem prometu, trgovini između trećih lica kao i prometu drvnih sortimenata iz uvoza.

(11) Pravna i fizička lica koja nanesu štetu šumama i šumskom zemljištu po bilo kojem osnovu dužni su vlasniku šume i šumskog zemljišta nadoknaditi štetu prema odštetnom cjenovniku.

(12) Federalni ministar donosi odštetni cjenovnik iz stava 11. ovog člana.

### **III. ŠUME I ŠUMSKO ZEMLJIŠTE S POSEBNIM REŽIMOM GOSPODARENJA**

#### **A. Zaštitne šume i šume s posebnom namjenom**

##### **Član 27. (Opći principi)**

(1) Da bi se obezbijedila njihova zaštita ili poseban režim gospodarenja, određene šume mogu biti proglašene zaštitnim šumama ili šumama s posebnom namjenom. Njima će se gospodariti na način koji će obezbijediti namjenu zbog koje su proglašene.

(2) Procjena funkcija zaštitnih šuma i šuma s posebnom namjenom utvrđuje se stručnim šumarskim elaboratom sa podacima o stanju šuma i principima gospodarenja šumama u cilju očuvanja šuma i ostvarivanja namjene proglašenja područja, a koristi se za proglašenje iz stava 1. ovog člana. Šume koje predstavljaju dio područja zaštićenog propisom donesenim u skladu sa drugim zakonom Federacije, koji također propisuje poseban režim gospodarenja za šume, smatraju se šumama s posebnom namjenom.

(3) Način gospodarenja i obnove šuma unutar zaštićenog područja propisuje se programom za gospodarenje šumama, u skladu sa svrhom radi koje su proglašene i na način određen aktom o njihovom proglašenju. Troškove gospodarenja šumama unutar zaštićenog područja snosi pravno lice na čiji je zahtjev proglašenje izvršeno. Programe gospodarenja šumama posebne namjene unutar zaštićenih područja, mogu izrađivati pravna lica registrovana za izradu šumskoprivrednih osnova u skladu sa članom 10. stav 1. ovog Zakona, a može ga provoditi pravna osoba registrovana za obavljanje poslova u šumarstvu.

(4) Saglasnost na programe gospodarenja šumama posebne namjene na područjima zaštićenim po osnovu propisa o zaštiti prirode i okoliša daje Federalno ministarstvo na osnovu prijedloga stručne komisije uz prethodno pribavljeno mišljenje Federalnog ministarstva okoliša i turizma.

(5) Propis kojim se šume proglašavaju zaštitnim šumama ili šumama s posebnom namjenom određuje režim gospodarenja takvim šumama, izvršioca propisanog režima kao i pravno lice koje je odgovorno za obezbjeđenje sredstava za pokriće troškova vezanih za posebni režim gospodarenja. Vlasnik/korisnik šume ima pravo na naknadu za ograničeno korištenje ili povećane troškove gospodarenja. Naknadu snosi pravno lice na čiji je zahtjev proglašenje izvršeno. Visina naknade se utvrđuje sporazumno, a ako se sporazum ne postigne naknada se utvrđuje kod nadležnog suda.

(6) Zaštitne šume i šume s posebnom namjenom moraju se ucrtati na kartu i na terenu obilježiti vidljivim znakovima koji se odrede u propisu o proglašenju šume. Šume će biti predmet nadzora nadležnog šumarskog inspektora bez obzira na tijelo koje je izvršilo proglašenje. Obilježavanje šuma vrši pravna osoba koja upravlja

zaštićenim područjem. Troškove obilježavanja snosi pravno lice na čiji je zahtjev šuma proglašena zaštitnom, odnosno šumom sa posebnom namjenom.

(7) Federalno ministarstvo na osnovu podataka koje mu dostavljaju kantonalna ministarstva, vodi evidenciju zaštitnih šuma i šuma sa posebnom namjenom.

(8) Federalni ministar, u sporazumu sa federalnim ministrom okoliša i turizma, donosi pravilnik kojim se propisuju elementi za izradu, postupak donošenja i reviziju programa gospodarenja šumama posebne namjene.

## **Član 28. (Zaštitne šume)**

(1) Zaštitne šume su:

- a) šume koje prvenstveno služe za zaštitu zemljišta na strmim terenima i zemljišta podložnih erozijama, bujicama, klizištima ili oštrim klimatskim uslovima koji ugrožavaju postojanje samih šuma;
- b) šume čiji je glavni zadatak zaštita naselja, privrednih i drugih objekata kao što su saobraćajnice, energetske objekti, objekti telekomunikacione infrastrukture, zaštita izvorišta i korita vodotoka, obale vodenih akumulacija kao i šume koje su podignute kao zaštitni pojasevi, odnosno koje služe protiv prirodnih nepogoda, katastrofa ili stihijskih efekata ljudskog djelovanja.

(2) Zaštitne šume iz stava 1. ovog člana proglašava vlada Federacije na prijedlog Federalnog ministarstva a na zahtjev kantonalnog ministarstva ili jedinice lokalne samouprave uz prethodno pribavljeno mišljenje Federalne uprave. U slučaju kad je prijedlog iniciran od strane kantonalnog ministarstva potrebno je pored mišljenja Federalne uprave prethodno pribaviti i mišljenje jedinice lokalne samouprave. U slučaju kad je prijedlog iniciran od strane jedinice lokalne samouprave potrebno je pored mišljenja Federalne uprave prethodno pribaviti i mišljenje kantonalnog ministarstva.

(3) Primjerak akta o proglašenju zaštitne šume obavezno se dostavlja Federalnom ministarstvu, kantonalnom ministarstvu, nadležnoj instituciji za zaštitu kulturno historijskog i prirodnog naslijeđa, Federalnoj upravi i jedinici lokalne samouprave.

## **Član 29. (Šume s posebnom namjenom)**

(1) Za šume sa posebnom namjenom proglašavaju se:

- a) šume unutar zaštićenih područja ili prirodnih vrijednosti zaštićene na osnovu propisa o zaštiti prirode;
- b) šume od posebnog značaja za odbranu i potrebe Oružanih snaga Bosne i Hercegovine;
- c) šume ili njeni dijelovi registrovani kao sjemenske sastojine i sjemenski objekti;
- d) šume od specijalnog značaja za pročišćavanje zraka, snabdjevanje vodom i njen kvalitet;
- e) šume namjenjene za izletišta, odmor, opće obrazovanje, rekreaciju, turizam, klimatska i druga lječilišta.

(2) Šume iz stava 1. tač. a), d) i e) ovog člana proglašavaju se šumama sa posebnom namjenom u skladu sa odredbama Zakona o zaštiti prirode („Službene novine Federacije BiH“, broj 33/03) ili drugim propisom koji također propisuje

poseban režim gospodarenja za šume, a šume iz stava 1. tačka c), ovog člana proglašava Federalno ministarstvo u skladu sa odredbama Zakona o sjemenu i sadnom materijalu šumskih i hortikulturnih vrsta drveća i grmlja („Službene novine Federacije BiH“, broj 71/05, 8/10)

(3) Za šume iz stava 1. tač. a) i b) ovog člana potrebno je pribaviti prethodno saglasnost Federalnog ministarstva, a za šume iz stava 1. tač. d) i e) ovog člana potrebno je pribaviti prethodno saglasnost kantonalnog ministarstva i jedinice lokalne samouprave.

(4) Primjerak akta o proglašenju šuma s posebnom namjenom obavezno se dostavlja Federalnom ministarstvu, kantonalnom ministarstvu, nadležnoj instituciji za zaštitu kulturno-historijskog i prirodnog naslijeđa, Federalnoj upravi i jedinici lokalne samouprave.

### **Član 30. (Zahtjev za proglašenje)**

(1) Zahtjev sa elaboratom za proglašenje šuma sa posebnim režimom gospodarenja koji podnosi zainteresovana institucija ili pravno lice obavezno sadrži sljedeće:

- a) cilj i razloge zbog kojih se predlaže proglašenje zaštitnih šuma i šuma sa posebnom namjenom;
- b) općinu, naziv katastarske općine, broj zemljišnoknjižnog uložka i broj katastarske parcele, kao i naziv šumsko gospodarske jedinice, broj odjela i oznaku odsjeka;
- c) digitaliziranu kartu razmjere 1:10.000 (za manja područja razmjera 1:5.000), sa ucrtanim parcelama za koju se traži proglašenje zaštitne šume odnosno šume sa posebnom namjenom;
- d) stručni šumarski elaborat sa podacima o stanju šuma i principima gospodarenja šumama u cilju očuvanja šuma i ostvarivanja namjene proglašenja područja zaštite;
- e) procjenu okolišnog uticaja;
- f) predložena ograničenja u gospodarenju;
- g) predložene naknade ukoliko one dođu u obzir;
- h) saglasnost jedinice lokalne samouprave
- i) odgovarajuće administrativne mjere uključujući javne obavijesti i rasprave.

(2) Federalna uprava u slučajevima predviđenim odredbama Šumarskog programa Federacije, podnosi prijedlog za proglašenje šuma s posebnim režimom gospodarenja.

## **B. Šume na kršu i pošumljavanje**

### **Član 31. (Šume na kršu)**

(1) Šume na kršu bitno smanjene produktivnosti i šumska zemljišta na kršu, zbog svojih specifičnosti (posebnosti) klasifikuju se kao područja sa posebnim režimom gospodarenja, te imaju podršku Federacije, kantona i jedinice lokalne samouprave.

(2) Šume i šumska zemljišta na kršu klasifikuju se kao područja velike opasnosti od šumskih požara.

## **Član 32.** **(Pošumljavanje krša i goleti)**

(1) Pošumljavanje krša i goleti vrši se prema planu za pošumljavanje koji naročito sadrži sljedeće:

- a) površine koje će se pošumljavati, naziv šumsko privrednog područja, gospodarske jedinice, broj odjela i oznaku odsjeka;
- b) saglasnost vlasnika zemljišta;
- c) analizu prirodnih karakteristika staništa, naročito u smislu tla i klimatskih uslova;
- d) izbor vrsta drveća, posebne karakteristike sadnica i opis razloga za njihov izbor;
- e) gustoću, način i tehniku sadnje;
- f) troškove sadnje i troškove održavanja pošumljenog područja za period od najmanje pet godina;
- g) procjenu funkcija koje će tek zasađene šume obavljati u tim predjelima;
- h) mjere zaštite od požara.

(2) Za monokulture četinarara koje zauzimaju više od pet hektara zemljišta obavezna je procjena okolišnog uticaja.

## **Član 33.** **(Procjena okolišnog uticaja)**

Procjena okolišnog uticaja je obavezna za podizanje monokultura na površini većoj od pet hektara i za prevođenje šumskog zemljišta drugoj namjeni iz člana 62. ovog Zakona, u skladu sa propisima o zaštiti okoliša.

## **IV. OČUVANJE I ZAŠTITA ŠUMA I NJIHOVIH FUNKCIJA**

### **A. Zaštita šuma i šumskog zemljišta od šteta**

#### **Član 34.** **(Zaštita šuma od požara)**

(1) U šumama i na šumskom zemljištu kao i na drugom zemljištu na udaljenosti do 150 m od šume nije dozvoljeno loženje otvorene vatre.

(2) Izgradnja i rad fabrika i drugih objekata koji rade sa otvorenim plamenom je zabranjena na udaljenosti manjoj od 300 metara od granice šume.

(3) Izuzev od stava 1. ovog člana, vatra u šumama i na šumskom zemljištu može se ložiti samo na mjestima određenim i obilježenim od strane Federalne uprave i vlasnika privatnih šuma uz pridržavanje propisanih uslova i mjera bezbjednosti.

(4) U šumama i na šumskim zemljištima namjenjenim za izletišta, u dane praznika i druge neradne dane, Federalna uprava je dužna obezbijediti dežurnu čuvarsku službu.

(5) Federalno ministarstvo na prijedlog Federalne uprave, klasifikuje šume i šumsko zemljište po stepenu opasnosti od šumskih požara. Područja u kojima opasnost od šumskog požara predstavlja ozbiljnu prijetnju ekološkoj ravnoteži ili bezbjednosti ljudi i stvari, klasifikuju se kao područja velike opasnosti. Područja gdje

opasnost od požara nije stalna ili ciklična ali predstavlja značajnu prijetnju šumskim ekosistemima klasifikuju se kao područja srednje opasnosti.

(6) Korisnici šuma u saradnji sa nadležnim kantonalnim ministarstvima i nadležnim organom civilne zaštite, izrađuju planove za zaštitu šuma od požara. Korisnici šuma i kantonalna ministarstva obavezni su provoditi ove planove i redovno izvještavati Federalnu upravu o izvršavanju mjera za zaštitu od požara.

(7) Korisnici šuma i vlasnici privatnih šuma dužni su da redovno obavještavaju Federalnu upravu i općinski organ nadležan za poslove civilne zaštite o svim požarima u šumama i na šumskom zemljištu.

(8) Federalni ministar pravilnikom propisuje sadržaj planova za zaštitu od požara i izgled obrasca na kojem se izvještava o šumskim požarima.

(9) Federalni ministar objavljuje karte teritorija prema stepenu opasnosti od šumskih požara.

### **Član 35.**

#### **(Hemijska sredstva i odlaganje otpada)**

(1) Upotreba hemijskih sredstava nije dozvoljena u šumi i na šumskom zemljištu.

(2) Izuzev od stava 1. ovog člana, certificirana hemijska sredstva, pod uslovom da ne ugrožavaju biološku ravnotežu, mogu biti korištena u šumskim rasadnicima i u šumama za zaštitu biljaka od divljači i od korova, za smanjenje prekomjerne populacije insekata čiji broj ne može biti smanjen ni na koji drugi način, te za gašenje šumskih požara.

(3) Nadležno kantonalno ministarstvo nakon ispitivanja potreba snadbijevanja vodom sa izvorišta u šumi izdaje dozvolu za iznimnu upotrebu hemijskih sredstava iz stava 2. ovog člana, u kojoj se propisuje način upotrebe. Vremenski rok za izdavanje dozvole za smanjenje prekomjerne populacije insekata je pet dana.

(4) Nije dozvoljeno odlagati otpad, smeće ili zagađujuće tvari u šumi ili na šumskom zemljištu. Vlasnici šuma obavezni su iz šume ukloniti otpad i smeće i imaju pravo na naknadu za nastale troškove od pojedinca ili pravnog lica koji su otpad, smeće ili zagađujuće tvari deponovali u šumu.

### **Član 36.**

#### **(Paša u šumama)**

(1) Paša, žirenje, brst, kresanje grana i lisnika (u daljem tekstu: pašarenje) u šumama nije dozvoljeno.

(2) Izuzev od stava 1. ovog člana korisnici šuma i vlasnici privatnih šuma mogu prema dogovorenoj naknadi dozvoliti pašarenje na površinama koje su određene u šumsko privrednoj osnovi. Paša se može dozvoliti samo pod uslovom da je stoka pod nadzorom čuvara stoke.

(3) Pristup stoke na pašu i pojila kroz šume dozvoljen je samo putem kojeg odredi korisnik šuma i vlasnik privatne šume.

(4) Paša u šumama neće se dozvoliti ako bi se time ugrozio biodiverzitet, odnosno flora, fauna i gljive zaštićene prema propisima o zaštiti prirode.

(5) Federalni ministar donosi pravilnik kojim se propisuju uslovi pod kojim se vrši paša

**Član 37.**  
**(Praćenje zdravstvenog stanja šuma)**

(1) Federalna uprava i korisnici šuma prate zdravstveno stanje šuma i obim šteta u šumama, te o tome izvještavaju Federalno ministarstvo, kantonalna ministarstva, jedinice lokalne samouprave i javnost.

(2) Federalni ministar donosi pravilnik kojim se određuje način praćenja zdravstvenog stanja šuma.

**B. Nedrvni šumski proizvodi**

**Član 38.**  
**(Korištenje nedrvenih šumskih proizvoda)**

(1) Korisnik šuma i vlasnik privatnih šuma mogu uzgajati i iskorištavati nedrvne šumske proizvode ili odobriti drugim pravnim i fizičkim licima njihovo iskorištavanje u obimu i na mjestima koja su određena u šumsko privrednoj osnovi.

(2) U šumi i na šumskom zemljištu zabranjeno je iskorištavanje humusa, gline, treseta, pijeska, šljunka i kamena sa površine zemlje kao i skidanje kore sa drveća i bušenje stabala, uklanjanje iz šume grana i drugih ostataka drveta od sječe kao i ostalih organskih materija koje su neophodne za poboljšanje plodnosti tla.

(3) Izuzev od stava 2. ovog člana korisnik šuma i vlasnik privatnih šuma mogu za svoje potrebe, za potrebe građana i drugih pravnih lica iskorištavati šumske proizvode iz stava 2. ovog člana i odobriti njihovo iskorištavanje drugima uz naknadu ukoliko je to predviđeno šumsko privrednom osnovom.

(4) Korisnik šuma može za vlastite potrebe koristiti mineralne sirovine na lokalitetima predviđenim šumsko privrednom osnovom i godišnjim planovima realizacije šumsko privredne osnove u svrhu izgradnje i održavanja šumskih puteva.

(5) Ako korisnik šuma planira koristiti mineralne sirovine u komercijalne svrhe dužan je postupiti u skladu sa odredbama člana 62. ovog Zakona.

(6) Korisnik šuma dužan je do 28. februara tekuće godine za prethodnu godinu Federalnoj upravi dostaviti podatke o vrsti i količini nedrvenih šumskih proizvoda koji su prikupljeni na području kojim gospodari.

(7) Korištenje nedrvenih šumskih proizvoda neće se dozvoliti ako bi se time ugrozio diverzitet šumskih ekosistema, odnosno flora, fauna i gljive zaštićene prema propisima o zaštiti prirode.

(8) Federalni ministar donosi pravilnik kojim se propisuju uslovi za uzgoj, iskorištavanje, sakupljanje i promet nedrvenih šumskih proizvoda.

**Član 39.**  
**(Divljač u šumi)**

(1) Vrste divljači i njihovo brojno stanje u šumama moraju obezbjediti biološku ravnotežu i ne smiju ugroziti druge članove ekosistema ili spriječiti ostvarivanje ciljeva gospodarenja šumama. Unošenje pojedinih vrsta divljači u šume i na šumska zemljišta mora obezbjediti njihov opstanak i ne smije ugroziti druge organizme na staništu.

(2) Korisnik lovišta dužan je pričinjene štete i oštećenja koja je prouzrokovala divljač u šumi nadoknaditi korisniku i vlasniku privatnih šuma u skladu sa odredbama važećeg Zakona o lovstvu.

### **C. Zaštita ugroženih vrsta**

#### **Član 40. (Ugrožene vrste)**

(1) Sječa, iskorjenjivanje ili bilo kakvo oštećivanje stabala Pančićeve omorike (*Picea omorika* (Pančić) Purk.), tise (*Taxus baccata* L.), mečje lijeske (*Corylus colurna* L.), planinskog javora (*Acer heldreichii* Orph.), planinskog bora (*Pinus mugo* Turra), zelene johe (*Alnus viridis* (Chaix) Lam. & DC.), munike (*Pinus heldreichii* Christ.), zanovijeti (*Petteria ramentacea* (Sieber) Presl), božikovina (*Ilex aquifolium*), lovorolisni likovac (*Daphne laureola*) i meka veprina (*Ruscus hippoglossum*), nije dozvoljena osim ako su potrebne uzgojne i sanitarne sječe.

(2) Zahtjev za odobravanje sječe iz stava 1. ovog člana podnosi se Federalnoj upravi, koja nakon uviđaja na terenu izdaje rješenje i dostavlja ga podnosiocu zahtjeva i nadležnoj šumarskoj inspekciji.

### **D. Saobraćaj u šumama**

#### **Član 41. (Izgradnja i održavanje šumske infrastrukture)**

(1) Šumska infrastruktura služi prvenstveno za potrebe gospodarenja šumama i sastavni je dio šume.

(2) Planiranje, izgradnja i održavanje šumske infrastrukture obavlja se uz poštivanje tehničkih, gospodarskih i ekoloških uslova, šumskog tla, vegetacije, divljači i uz njihovu maksimalnu zaštitu.

(3) Pri planiranju i izgradnji šumske infrastrukture potrebno se prilagoditi prirodnom okolišu te uvažavati potrebe lokalne zajednice, kao i protupožarne, turističke i rekreativne potrebe.

(4) Šumska infrastruktura mora biti izgrađena, održavana i korištena na način da isključuje:

- a) ugrožavanje izvora vode;
- b) pojavu erozivnih procesa;
- c) sprječavanje režima tečenja površinskih i podzemnih voda;
- d) narušavanje ravnoteže nestabilnog tla i povećanje rizika od klizišta;
- e) uticaj na područja koja su važna za opstanak divljih životinja i biološku raznolikost;
- f) uticaj na prirodno i kulturno naslijeđe;
- g) ugrožavanje ostalih funkcija ili višenamjensku upotrebu šume.

(5) Šumski kamionski put se može graditi nakon što se izradi projekt za njegovu izgradnju i pribavi dozvola nadležnog organa.

(6) Korisnik šuma, u skladu sa odredbama ovog Zakona, gradi, održava i nadgleda šumsku transportnu infrastrukturu i promet na istoj.



(7) Korisnik šuma dostavlja podatke neophodne za uspostavljanje i vođenje katastra šumske infrastrukture Federalnoj upravi koja jedna primjerak iste dostavlja jedinici lokalne samouprave.

#### **Član 42. (Saobraćaj u šumama)**

(1) Nije dozvoljeno kretanje motornih vozila u šumama i na šumskim putevima osim u svrhu gospodarenja šumama i nadzora, spašavanja, policijskih istraga, vojnih manevara, mjera za zaštitu od prirodnih katastrofa, te pristupa vlasnika, korisnika i pojedinca zemljištu, za koje su odgovorni, kao i lokalnog stanovništva.

(2) Vlasnik i korisnik šuma i šumskog zemljišta mogu dozvoliti kretanje šumskim putem trećem licu po dogovoru koji može uključivati određenu naknadu. Za organizovanje biciklističkih i moto trka šumskim putem potrebno je pribaviti dozvolu korisnika/vlasnika.

(3) Bicikli se mogu koristiti na šumskim putevima širim od dva metra.

(4) Šteta na šumskim putevima učinjena od strane drugih korisnika mora biti nadoknađena vlasnicima šuma i korisniku šuma.

#### **Član 43. (Pristup šumama)**

(1) Sva lica imaju pravo kretati se kroz šumu ili šumskim zemljištem u cilju rekreacije, ako nije drugačije određeno ovim ili nekim drugim federalnim zakonom. Sva lica koja ovako koriste šumu ili šumsko zemljište to rade na vlastitu odgovornost. Korisnik odnosno vlasnik šume nisu obavezni preduzeti posebne mjere predostrožnosti prema posjetiocima šuma niti će se smatrati odgovornim za bilo kakve štete ili povrede koje pretrpe takva lica.

(2) Bez odobrenja korisnika ili vlasnika šume zabranjeno je:

- a) razapinjati šator ili postavljati logor u šumi;
- b) smještati pčelinjake;
- c) loviti, ribariti i postavljati zamke;
- d) sakupljati nedrvne šumske proizvode u količini koja prelazi 1 kg;
- e) ulaziti u fizički i znakovima označena šumska područja i zatvorene šumske ceste;
- f) ulaziti u područja, šumske ceste ili izletišta gdje se vrši sječa;
- g) ulaziti u područja prirodne obnove, pošumljena područja i šumske rasadnike i ulaziti u predjele i infrastrukturu koja je namijenjena za lov.

(3) Postavljanje ograda unutar šume je dozvoljeno samo u mjeri koja je neophodna za odgovarajuće radove gospodarenja šumama, zaštite i uzgoja divljači, sprečavanja štete od divljači i ni u kom slučaju neće ozbiljno remetiti pristup šumama i šumskom zemljištu.

## **V. UPRAVLJANJE ŠUMAMA, KATASTAR ŠUMA I EKONOMSKE FUNKCIJE ŠUMA**

### **A. Upravljanje šumama**

#### **Član 44. (Državne i privatne šume)**

Šume i šumsko zemljište su u državnom vlasništvu (u daljem tekstu: državne šume) i u vlasništvu fizičkih i pravnih lica (u daljem tekstu: privatne šume).

#### **Član 45. (Upravljanje državnim šumama)**

(1) Državne šume i šumska zemljišta su u vlasništvu Federacije. U ostvarivanju prava po osnovu vlasništva, nad šumom i šumskim zemljištem u državnom vlasništvu, Federaciju zastupa Federalno ministarstvo.

(2) Državnim šumama i šumskim zemljištima upravlja Federalna uprava pod uslovima utvrđenim ovim zakonom.

#### **Član 46. (Sticanje vlasništva)**

(1) Pravo vlasništva nad državnim šumama i šumskim zemljištima ne može se steći njihovim korištenjem ili zauzimanjem bez obzira na period trajanja istog, odnosno dosjelošću.

(2) Strana fizička i pravna lica ne mogu sticati pravo vlasništva na šumama i šumskim zemljištima.

(3) Ako kanton ili jedinica lokalne samouprave kupi šumu ili šumsko zemljište i na tom zemljištu podignu šumu ili ako dobiju šumu ili šumsko zemljište kao poklon od bilo kojeg fizičkog ili pravnog lica, te šume postaju njihovo vlasništvo.

#### **Član 47. (Provođenje prava i obaveza kantona)**

(1) Kantonalno ministarstvo provodi prava i obaveze iz oblasti šumarstva na području kantona u skladu sa odredbama ovog Zakona i propisa donesenih na osnovu ovog Zakona.

(2) Kantonalno ministarstvo jednom godišnje dostavlja izvještaj vladi kantona o stanju šuma i šumskog zemljišta na području kantona.

#### **Član 48. (Zabrana zauzimanja)**

(1) Zabranjeno je i kažnjivo svako neovlašteno zauzimanje državnih šuma i šumskog zemljišta.

(2) Neovlašteno zauzetu državnu šumu i šumsko zemljište bespravni korisnik dužan je napustiti odmah po prijemu naloga šumarskog inspektora ili čuvara šuma.

## **Član 49.** **(Promet šuma)**

(1) Zabranjen je promet državnih šuma i šumskih zemljišta. Svaki promet državnih šuma izvršen suprotno odredbama ovog Zakona je nezakonit i takav ugovor je ništavan.

(2) Izuzev od odredaba stava 1. ovog člana promet državnih šuma može se vršiti samo u svrhu arondacije i komasacije kao i putem zamjene uz prethodno pribavljenu saglasnost federalnog ministra koja se zasniva na mišljenju Federalne uprave i jedinice lokalne samouprave na čijem se području šuma nalazi..

(3) Državne šume ne mogu biti predmetom privatizacije.

(4) Federacija ima pravo prvenstva kupovine privatnih šuma koje su Vlada Federacije BiH, Federalno ministarstvo ili vlada kantona proglasili zaštitnim šumama ili šumama s posebnom namjenom.

(5) Federacija ima pravo prvenstva kupovine suvlasničkog dijela šume i šumskog zemljišta od vlasnika privatne šume ako je parcela u suvlasništvu sa državom.

(6) Osim u slučajevima iz stava 4. ovog člana, vlasnik privatne šume i poljoprivrednog zemljišta koje graniči sa šumom i šumskim zemljištem koje se prodaje, ima pravo prvenstva za kupovinu te šume. Ovo pravo prvenstva može se tražiti samo u slučaju smetnji u pogledu gospodarenja graničnim šumama, ako to potvrdi Federalna uprava.

(7) Federalni ministar donosi pravilnik kojim se utvrđuju uslovi i procedure za zamjenu državnih šuma.

## **Član 50.** **(Utvrđivanje granica državnih šuma)**

(1) Granice državnih šuma moraju na terenu biti obilježene vidnim i trajnim znakovima.

(2) Granice državnih šuma, koje nisu utvrđene, moraju se utvrditi u skladu sa zakonom koji uređuje premjer i katastar nekretnina i propisima donesenim na osnovu tog zakona.

(3) Utvrđene granice iz stava 2. ovog člana moraju se ucrtati na katastarskim planovima i provesti kroz katastarski operat općinskog organa nadležnog za geodetske poslove.

(4) Poslove obilježavanja granica državnih šuma, čuvanja i održavanje graničnih znakova vrši Federalna uprava.

(5) Federalni ministar donosi pravilnik o načinu obilježavanja granica državnih šuma, kao i vrsti i postavljanju graničnih znakova.

## **Član 51.** **(Upravljanje privatnim šumama)**

(1) Privatne šume, u smislu ovog Zakona, su sve šume i šumsko zemljište za koje fizičko ili pravno lice valjanim dokumentima iz zemljišne knjige dokažu vlasništvo.

(2) Privatnim šumama upravljaju i gospodare njihovi vlasnici u skladu sa ovim zakonom, podzakonskim propisima i odredbama šumsko privredne osnove.

(3) Čuvanje privatnih šuma u nadležnosti je njihovih vlasnika.

(4) Vlasnik privatne šume ugovorom, uz naknadu, prenosi obavljanje stručnih poslova kako je definisano ovim zakonom, Federalnoj upravi ili pravnom licu za obavljanje stručnih poslova u privatnim šumama.

(5) Naknada iz stava 4. ovog člana iznosi najviše 10 % od cijene na panju posječenih šumskih drvnih sortimenata po jedinstvenom cjenovniku šumskih proizvoda koji donosi Federalna uprava.

(6) Pod stručnim poslovima iz stava 4. ovog člana podrazumjevaju se doznaka, primanje, premjeravanje, evidentiranje, izdavanje otpremnog iskaza, planiranje šumsko-uzgojnih radova, stručni nadzor, stručni savjetodavni poslovi i zaštita šuma.

(7) Kada vlasnik privatne šume ugovorom prenese obavljanje stručnih poslova Federalnoj upravi, naknada se uplaćuje na namjenski račun Federalne uprave.

(8) Federalna uprava ili pravna lica za obavljanje stručnih poslova u privatnim šumama dužni su voditi evidencije o izvršenim radovima i provedenim mjerama predviđenim kantonalnim šumsko-razvojnim planom, šumsko privrednom osnovom i projektom za izvođenje. Podaci predviđeni evidencijama moraju se evidentirati za proteklu godinu najkasnije do 28. februara tekuće godine.

(9) Za privatne šume projekat za izvođenje izrađuje se u skladu sa odredbama člana 13. ovog Zakona i donosi ga Federalna uprava ili pravno lice za obavljanje stručnih poslova u privatnim šumama na koje su preneseni stručni poslovi.

(10) Federalni ministar donosi pravilnik kojim se propisuje način i oblik vođenja registra evidencija iz stava 8. ovog člana.

## B. Ekonomske funkcije šume

### Član 52. (Zaključivanje ugovora)

(1) Na području jednog kantona može poslovati:

a) jedno ili više šumskoprivrednih društava (korisnik/a šuma) u skladu sa odlukama Skupštine kantona a na osnovu ekspertnog mišljenja visokoškolske naučno-istraživačke ustanove iz oblasti šumarstva. Minimalna teritorija kojom može gospodariti jedno šumskoprivredno društvo je šumskoprivredno područje

b) jedno šumskoprivredno društvo u administrativnim granicama jednog kantona u skladu sa odlukama Skupštine kantona.

U sklopu šumskoprivrednog društva formiraju se organizacione jedinice za područje jedne ili više općina u skladu sa aktima društva. Akt o osnivanju šumsko privrednog društva donosi Skupština kantona uz prethodno pribavljeno mišljenje predstavničkog tijela zainteresiranih jedinica lokalne samouprave.

(2) Federalno ministarstvo ugovorom prenosi poslove gospodarenja državnim šumama korisniku šuma.

(3) Prava, zadaci i odgovornosti iz stava 2. ovog člana koje Federalno ministarstvo ugovorom prenosi kantonalnim šumsko-privrednim društvima (korisnicima šuma) pored ostalog sastoje se iz:

a) realizacije šumsko privredne osnove (godišnjih planova gospodarenja ukoliko nije donešena šumsko privredna osnova) i izrade i realizacije projekata za izvođenje;

b) projektovanja, izgradnje, rekonstrukcije i održavanja šumske infrastrukture;

- c) prometa šumskih drvnih sortimenata i nedrvnih šumskih proizvoda;
- d) izvršavanja programa i planova biološke reprodukcije šuma propisanih šumsko privrednom osnovom;
- e) provođenja mjera integralne zaštite šuma u skladu sa ovim zakonom;
- f) proizvodnje i prometa šumskog sjemena, šumskog i hortikulturnog sadnog materijala;
- g) izvršavanja planova korištenja nedrvnih šumskih proizvoda;
- h) realizacije planova razvoja šumarstva i mjera racionalizacije u šumarstvu;
- i) realizacije aktivnosti predviđenih izvedbenim dijelom Šumarskog programa Federacije;
- j) svih ekonomskih odgovornosti, koristi i odluka;
- k) ostalih poslova, zadataka i odgovornosti u skladu sa ugovorom o prenosu poslova gospodarenja.

(4) Ukoliko Skupština kantona iz bilo kojeg razloga ne formira kantonalno šumsko privredno društvo, korisnika državnih šuma na području tog kantona određuje Vlada Federacije.

(5) Korisnik šuma kojem se ugovorom iz stava 2. ovog člana prenose poslovi gospodarenja državnim šumama obavezan je šumske drvne sortimente prodavati po tržišnim uslovima i cijenama.

(6) Korisnik šuma ne može prenositi na treća lica prava koja proističu po osnovu ugovora.

(7) Za direktora šumsko-privrednog društva imenovanja se vrše u skladu sa aktima društva. Za direktora šumsko-privrednog društva može se imenovati samo stručnjak iz oblasti šumarstva, diplomirani inženjer šumarstva/master šumarstva sa najmanje deset godina radnog iskustva u sektoru šumarstva od čega minimalno pet godina na složenim/rukovodnim poslovima.

### **Član 53.**

#### **(Realizacija ugovornih obaveza)**

(1) Federalna uprava prati realizaciju ugovorenih obaveza iz člana 52. stav 2. ovog Zakona i o tome izvještavaju Federalno ministarstvo, kantonalno ministarstvo i jedinicu lokalne samouprave.

(2) Korisnici šuma dužni su voditi evidenciju o izvršenim radovima i provedenim mjerama predviđenim izvedbenim dijelom Šumarskog programa Federacije, kantonalnim šumsko-razvojnim planom, šumsko privrednom osnovom, (godišnjim planom gospodarenja ukoliko nije donešena šumsko privredna osnova), godišnjim planom realizacije šumsko privredne osnove i projektom za izvođenje. Podaci predviđeni evidencijama moraju se evidentirati za proteklu godinu i dostaviti Federalnoj upravi najkasnije do 28. februara tekuće godine za prethodnu godinu.

(3) Federalni ministar donosi pravilnik o načinu i obliku vođenja registra evidencija iz stava 2. ovog člana.

### **Član 54.**

#### **(Naknada za korištenje šuma)**

(1) Korisnik državnih šuma dužan je plaćati naknadu za korištenje šuma u visini 7% od ostvarenog prihoda od drveta računajući cijenu drveta na panju i prihoda ostvarenog od nedrvnih šumskih proizvoda po jedinstvenom cjenovniku šumskih

proizvoda koji donosi Federalna uprava, u skladu sa odredbama člana 70. ovog Zakona.

(2) Naknada za korištenje šuma iz stava (1) ovog člana će se primjenjivati najduže 12 mjeseci od dana donošenja ovog Zakona. U tom roku će Federalni ministar na osnovu ekspertize visokoškolske naučno-istraživačke ustanove iz oblasti šumarstva odrediti visinu naknade za korištenje šuma za svako pojedinačno šumsko privredno područje u Federaciji. Uz ovu ekspertizu potrebno je pribaviti i mišljenje kantonalnih ministarstva, šumsko privrednih društava za područje konkretnog kantona i zainteresiranih jedinica lokalne samouprave.

## **C. Katastar šuma**

### **Član 55. (Katastar šuma)**

(1) Korisnici šuma i pravno lice za obavljanje stručnih poslova u privatnim šumama ukoliko je obavljanje stručnih poslova za privatne šume prenešeno ugovorom na njega, dužni su Federalnoj upravi dostaviti katastar državnih i privatnih šuma najdalje do 31. marta tekuće godine za prethodnu godinu sa evidentiranim svim promjenama u toku godine.

(2) Po jedan primjerak izrađenog katastra šuma za teritoriju Federacije, Federalna uprava dostavlja Federalnom ministarstvu, kantonalnom ministarstvu i Savezu općina i gradova Federacije BiH.

(3) Federalni ministar donosi pravilnik kojim se propisuje način vođenja katastra šuma za državne i privatne šume.

## **D. Odnosi kod korištenja šuma**

### **Član 56. (Prava trećih lica)**

(1) Prava trećih lica na državnu šumu poštuju se ako su upisana u zemljišne knjige.

(2) Prava trećih lica mogu prestati uz odgovarajuću novčanu naknadu, nakon zahtjeva vlasnika šume.

(3) Zabranjeno je utvrđivati nova ili širiti postojeća prava trećih lica na državnu šumu, osim ako je to u skladu sa odredbama ovog Zakona.

### **Član 57. (Zaštita susjednih parcela)**

(1) Prilikom gospodarenja šumom, vlasnik ili korisnik šume treba voditi dužnu pažnju o susjednim parcelama.

(2) Ako vlasnik ili korisnik šume, u procesu gospodarenja šumom, svojim aktivnostima vrši uticaj na susjedne parcele, obavezan je tražiti saglasnost vlasnika susjedne parcele prije nego započne tu aktivnost. Ako se ne može doći do sporazuma, Federalna uprava će odlučiti o tome da li se ta aktivnost može provesti i u kom obliku, a naknada se utvrđuje sporazumno ili putem nadležnog suda.

**Član 58.**  
**(Korištenje parcela trećih lica)**

(1) Vlasnik, odnosno korisnik šume i šumskog zemljišta, dužan je da dozvoli privremeni prijevoz (prinudni put) ili smještaj šumskih proizvoda sa susjednih parcela na svom zemljištu ako to nije moguće izvršiti na drugi način, ili ako bi drugi način bio nesrazmjerno skuplji.

(2) Korisnik prinudnog puta ili smještaja proizvoda dužan je da vlasniku, odnosno korisniku zemljišta, plati naknadu za to korištenje. Naknada za korištenje utvrđuje se sporazumno, u suprotnom putem nadležnog suda.

(3) Ako je zbog izgradnje šumske transportne infrastrukture neophodno koristiti parcele trećih lica izvršit će se eksproprijacija takvih parcela u skladu sa zakonom. Od drugih vlasnika šume i ostalih pravnih ili fizičkih lica koja imaju koristi od ovakve infrastrukture, može se zahtijevati da učestvuju u troškovima izgradnje i održavanja u skladu sa koristima koje će imati od toga.

**Član 59.**  
**(Povezivanje vlasnika šuma)**

(1) U cilju održivog gospodarenja i unaprjeđenja stanja šumskih ekosistema u privatnoj svojini mogu se osnivati udruženja-asocijacije vlasnika privatnih šuma.

(2) Udruženja vlasnika privatnih šuma pored ostalog obavljaju poslove koji se odnose na:

- a) informisanje svojih članova o svim pitanjima koja su značajna za upravljanje i gospodarenje šumama te o programima, procedurama i mogućnostima korištenja podrške vlasnicima privatnih šuma i ruralnom razvoju;
- b) savjetodavne poslove oko upravljanja i gospodarenja šumama;
- c) zastupanje interesa članova;
- d) ostale poslove koji nisu u suprotnosti sa ovim zakonom i drugim propisima.

(3) Federalno ministarstvo, Kantonalno ministarstvo i jedinice lokalne samouprave mogu putem Federalne uprave obezbijediti finansijsku i stručnu pomoć za osnivanje i funkcionisanje udruženja vlasnika privatnih šuma.

**VI. PROMJENA NAMJENE I KORIŠTENJE ŠUMA U DRUGE SVRHE**

**A. Promjena namjene šumskog zemljišta i gradnja u šumi**

**Član 60.**  
**(Izdvajanje iz šumsko privrednog područja)**

(1) Vlada Federacije BiH može na prijedlog Federalnog ministarstva pojedine dijelove državnih šuma izdvojiti iz šumsko privrednog područja radi njihovog korištenja za potrebe Oružanih snaga Bosne i Hercegovine i policijskih struktura.

(2) Vlada Federacije BiH može na prijedlog Federalnog ministarstva dijelove državnih neproduktivnih šumskih zemljišta izdvojiti iz šumsko privrednog područja i prenijeti u vlasništvo kantonu ili jedinici lokalne samouprave na korištenje u druge svrhe koje daju veću trajnu korist.

(3) Zahtjev sa elaboratom o namjeni i opravdanosti korištenja zemljišta iz stava 2. ovog člana može podnijeti vlada kantona ili predstavničko tijelo jedinica lokalne samouprave uz pribavljeno mišljenje Federalne uprave.

(4) Podnosilac zahtjeva mora platiti naknadu vlasniku šume u visini koja se određuje u skladu sa odredbama Zakona o eksproprijaciji („Službene novine Federacije BiH“, broj 70/07). Naplaćena sredstva su namjenski prihod Budžeta Federacije BiH u iznosu od 40%, odnosno namjenski prihod budžeta kantona u iznosu od 60%. Namjenski prihod budžeta kantona ostvaren po ovom osnovu koristi se samo u svrhu podizanja novih šuma i kupovinu šuma na području lokalne zajednice na kojoj je ostvaren, u skladu sa odredbama ovog Zakona.

(5) Izuzetno od plaćanja naknade iz stava 4. ovog Člana može biti oslobođen podnosilac zahtjeva (kanton, jedinica lokalne samouprave) ako se izdvajanje vrši za javne obrazovne ili zdravstvene potrebe. Sve ostale odredbe ovog Člana moraju biti ispunjene. Odluku o oslobađanju od plaćanja naknade donosi Federalna vlada na prijedlog katonalne vlade ili predstavničkog tijela jedinice lokalne samouprave.

### **Član 61. (Krčenje šume)**

(1) Krčenje šuma je zabranjeno.

(2) Krčenje šume, odnosno promjena namjene šumskog zemljišta, može se dozvoliti samo ako se radi o izgradnji objekata planiranih važećim planom prostornog uređenja u slučajevima kada se time postižu veće trajne koristi i ako neće biti štetnih posljedica za okoliš.

(3) Dozvolu iz stava 2. ovog člana donosi Federalno ministarstvo, na osnovu saglasnosti Federalne uprave te pribavljenog mišljenja kantonalnog ministarstva nadležnog za poslove šumarstva i jedinice lokalne samouprave na čijem području se nalazi šuma i/ili šumsko zemljište.

(4) Zahtjev za krčenje šuma odnosno prevođenje šumskog zemljišta drugoj namjeni može podnijeti vlasnik, koncesionar i drugo ovlašteno lice u skladu sa odredbama ovog Zakona.

(5) Zahtjev za krčenje, odnosno promjenu namjene šumskog zemljišta, podnosi se Federalnom ministarstvu i sadrži sljedeću dokumentaciju:

- a) izvadak iz važećeg plana prostornog uređenja;
- b) izvadak iz zemljišnih knjiga i kopiju katastarskog plana;
- c) koncesioni ugovor ako se radi o koncesiji;
- d) okolišnu saglasnost u skladu sa propisima o zaštiti okoliša;
- e) saglasnost organa nadležnog za zaštitu istorijskog i prirodnog naslijeđa;
- f) saglasnost organa nadležnog za vodoprivredu;
- g) procjena visine troškova podizanja i održavanja novih šuma na površini koja je predmet krčenja sa tržišnom vrijednosti drveta koje se dobije sječom.

(6) Odredbe ovog Zakona i podzakonskih propisa donesenih na osnovu njega, a koji se tiču zaštite šuma, primjenjuju se i za šume za koje je izdata dozvola za krčenje ako nisu iskrčene.

(7) Ako se u roku od dvije godine od dana dostavljanja dozvole iz stava 2. ovog člana iskrčeno zemljište ne privede namjeni radi koje je krčenje izvršeno, korisnik iskrčenog zemljišta dužan je o svom trošku izvršiti njegovo pošumljavanje.

(8) Dozvola za promjenu namjene šumskog zemljišta važi godinu dana od dana njenog donošenja.



(9) Podnosilac zahtjeva za promjenu namjene šumskog zemljišta obavezan je prije započinjanja radova uplatiti naknadu čija vrijednost se određuje u visini troškova podizanja i održavanja novih šuma na površini koja ne može biti manja od površine kojoj se mijenja namjena dodajući tome tržišnu vrijednost drveta koja se dobije sječom. Naknada se uplaćuje kao namjenski prihod Federalne uprave i ista se može koristiti na području jedinice lokalne samouprave na čijoj teritoriji je ostvarena samo u svrhu podizanja novih šuma i kupovinu šuma u skladu sa odredbama ovog Zakona.

(10) Troškove postupka za izdavanje dozvole iz ovog člana snosi podnosilac zahtjeva.

(11) Kontrolu naplate naknade iz stava 9. ovog člana vrši nadležna šumarska inspekcija.

## **Član 62.** **(Gradnja u šumi)**

(1) U šumi i na šumskom zemljištu može se graditi samo šumska infrastruktura, objekti potrebni za gospodarenje šumama u skladu sa važećom šumsko privrednom osnovom i lovno uzgojni i lovno tehnički objekti u skladu sa važećom lovno privrednom osnovom.

(2) Izuzetno od stava 1. ovog člana, u šumi i na šumskom zemljištu mogu se graditi objekti predviđeni važećim planom prostornog uređenja nakon pribavljanja dozvole za promjenu namjene zemljišta iz člana 61. ovog Zakona.

(3) U izradi plana prostornog uređenja iz čl. 20. stav 1. i 21. Zakona o prostornom planiranju i korištenju zemljišta na nivou Federacije Bosne i Hercegovine („Službene novine Federacije BiH“, br. 2/06,72/07 i 32/08) kojima se određuju granice urbanog područja i šuma i šumskog zemljišta, a koje donose nadležni organi, obavezno učestvuju predstavnici Federalne uprave.

(4) Plan prostornog uređenja iz stava 3. ovog člana a u vezi člana 61. ovog Zakona donosi se na osnovu pribavljenog mišljenja kantonalnog ministarstva ukoliko se predviđa zahvatanje šumskog zemljišta površine manje od dva hektara, odnosno Federalnog ministarstva za površine veće od dva hektara, u bilo kojem slučaju iz ovog stava obavezno je pribaviti i mišljenje jedinice lokalne samouprave.

(5) Podnosilac zahtjeva za gradnju u šumi obavezan je prije otpočinjanja radova na izgradnji objekata predviđenih detaljnim planom prostornog uređenja pribaviti dozvolu za promjenu namjene šumskog zemljišta iz člana 61. ovog Zakona, osim za objekte iz stava 1. ovog člana.

## **B. Zakup**

### **Član 63.** **(Zakup šumskog zemljišta)**

(1) Davanje državnih šuma i šumskog zemljišta u zakup je zabranjeno.

(2) Izuzev od odredbi stava 1. ovog člana, Federalno ministarstvo može pojedina šumska zemljišta ugovorom davati u zakup uz prethodno pribavljeno mišljenje od Federalne uprave i zainteresovane jedinice lokalne samouprave. Ugovor o zakupu se može zaključiti radi postavljanja privremenih objekata čija je gradnja predviđena ugovorom o koncesiji i GSM baznih stanica, uzgoja divljači, podizanja višegodišnjih nasada na neobraslom šumskom zemljištu i u drugim slučajevima

predviđenim odlukom Vlade Federacije BiH, ukoliko se time ne narušavaju funkcije šume.

(3) Šumsko zemljište koje se daje u zakup može se koristiti samo u skladu sa ugovorom o zakupu i ne može se davati u podzakup.

(4) Prije sklapanja ugovora o zakupu šumskog zemljišta potrebno je pribaviti mišljenje Federalnog pravobranilaštva / Federalnog pravobraniteljstva.

(5) Naknada koja se ostvaruje po osnovu ugovora o zakupu iz stava 2. ovog člana uplaćuje se na poseban račun Budžeta Federacije.

(6) Uslove, namjenu, cijenu i način davanja šumskog zemljišta u državnom vlasništvu u zakup i zasnivanje služnosti propisuje Vlada Federacije BiH.

## **C. Služnost**

### **Član 64.**

#### **(Pravo služnosti na državnoj šumi i šumskom zemljištu)**

(1) Na šumi i šumskom zemljištu u državnom vlasništvu može se uspostaviti pravo služnosti u svrhu izgradnje vodovoda, kanalizacije, plinovoda, električnih vodova, kao i za druge namjene ako je proglašen javni interes u skladu sa odredbama Zakona o eksproprijaciji.

(2) Ugovor kojim se uspostavlja služnost na šumi i šumskom zemljištu u državnom vlasništvu zaključuje se između korisnika i Federalnog ministarstva.

(3) Naknada koja se ostvaruje po osnovu služnosti iz stava 1. ovog člana uplaćuje se u korist Budžeta Federacije BiH.

(4) Lice u čiju korist se zasniva služnost obavezno je uplatiti naknadu iz člana 61. ovog Zakona, bez provođenja procedure za krčenje šume. Naknada se uplaćuje kao namjenski prihod Federalne uprave i ista se koristi samo u svrhu podizanja novih šuma i kupovinu šuma u skladu sa odredbama ovog Zakona na području jedinice lokalne samouprave na čijoj teritoriji je ostvarena

(5) Jedinice lokalne samouprave su oslobođene plaćanja naknade iz stava 3. ovog člana samo po pitanju vodosnabdijevanja.

## **VII. ŠUMARSKE INSTITUCIJE**

### **A. Federalna uprava za šumarstvo**

#### **Član 65.**

##### **(Federalna uprava za šumarstvo)**

(1) U cilju nadzora nad ostvarivanjem vlasničkih prava, uspostavljanja i ostvarivanja funkcije upravljanja u smislu ovog Zakona, provođenja administrativno-upravnih poslova, kreiranja i provođenja jedinstvene šumarske politike formira se samostalna Federalna uprava za šumarstvo (u daljem tekstu Federalna uprava).

(2) U sastavu Federalne uprave formiraju se teritorijalne ispostave po kantonima sa nižim organizacionim jedinicama .po općinama. Organizovanje teritorijalnih ispostava i nižih organizacionih jedinica definisat će se opštim aktima Federalne uprave a na osnovu stvarnih potreba. Formiranje teritorijalnih ispostava Federalne uprave za svaki pojedinačni kanton i nižih organizacionu jedinica za svaku općinu nije obavezno.

(3) Sjedište Federalne uprave je u Sarajevu. Sjedišta teritorijalnih ispostava po kantonima ne mogu biti u općinama u kojima su sjedišta kantonalnih šumsko privrednih društava.

## **Član 66.** **(Poslovi Federalne uprave)**

(1) Federalna uprava obavlja sljedeće poslove:

- a) obezbjeđuje neposrednu zaštitu državnih šuma putem čuvarske službe;
- b) prikuplja i vodi bazu podataka o stanju i razvoju svih šuma, uključujući podatke inventure svih šuma, ustanovljava i vodi katastar šuma i šumskog zemljišta i katastar šumske infrastrukture u državnom i privatnom vlasništvu za područje Federacije;
- c) priprema nacrt Šumarskog programa Federacije i podnosi ga Federalnom ministarstvu;
- d) priprema opšte smjernice i sa kantonalnim ministarstvima koordinira poslove na izradi kantonalnih šumsko-razvojnih planova
- e) priprema i prati provođenje programa za realizaciju aktivnosti predviđenih izvedbenim dijelom Šumarskog programa Federacije;
- f) provodi proceduru izrade, finansira, prati provedbu i vodi evidenciju važenja šumsko privrednih osnova za sve šume na području FBiH (državne i privatne šume);
- g) pruža stručnu pomoć za izradu šumsko privrednih osnova;
- h) vrši nadzor na izradi šumsko-privrednih osnova
- i) izrađuje plan i program za biološku obnovu šuma, programe i planove za pošumljavanje krša i goleti koji se finansiraju iz Budžeta Federacije BiH;
- j) utvrđuje i vodi registar i evidenciju objekata za proizvodnju i doradu šumskog sjemena i proizvođača šumskog i ukrasnog drveća i grmlja u Federaciji;
- k) vrši stručne poslove u vezi proizvodnje šumskog sjemena i šumskog sadnog materijala koji proizlaze iz odredaba ovog Zakona i propisa iz oblasti o sjemenu i sadnom materijalu i priprema potrebnu dokumentaciju o zdravstvenom stanju i kvalitetu šumskog sjemena i šumskog sadnog materijala;
- l) prati zdravstveno stanje šuma, obavlja poslove dijagnostno–prognozne službe i prati stanje i stepen oštećenosti šuma;
- m) izrađuje i u okviru svoje nadležnosti provodi programe integralne zaštite šuma i planove protivpožarne zaštite te vodi odgovarajuće baze podataka
- n) izrađuje podloge za programe razvoja šumarstva i lovstva i obezbjeđuje podatke za potrebe prostornih planova uz primjenu tehničkih normativa iz oblasti šumarstva;
- o) prati ekonomsko stanje šumarstva i redovno podnosi izvještaj Federalnom ministru o cijenama šumskih drvnih sortimenata i nedrvnih šumskih proizvoda;
- p) informiše i upoznaje javnost o stanju šuma i razvoju šumarstva te izdaje prigodne stručno-popularne publikacije o stanju šuma i njihovom značaju;
- q) izrađuje i donosi jedinstveni minimalni cjenovnik šumskih proizvoda koji služi kao jedinstvena osnovica za obračun naknada predviđenih ovim Zakonom te kao osnova za izradu cjenovnika koje donose korisnici državnih šuma;
- r) priprema i izrađuje programe iz oblasti šumarstva koji se finansiraju ili sufinansiraju iz namjenskih sredstava Budžeta Federacije BiH uz prethodno pribavljenu saglasnost Federalnog ministarstva;
- s) podržava i promovira naučno istraživačku djelatnost i transfer znanja iz oblasti šumarstva i lovstva;

- t) priprema i daje saglasnost, mišljenja i stručna tumačenja u skladu sa odredbama ovog Zakona
- u) organizuje savjetovanja i pruža stručnu i savjetodavnu pomoć korisniku državnih šuma i vlasnicima privatnih šuma;
- v) razvija međuentitetsku saradnju iz oblasti šumarstva i lovstva;
- w) provodi i primjenjuje međunarodne konvencije i standarde iz oblasti šumarstva i lovstva;
- x) utvrđuje i provodi plan borbe protiv korupcije u okviru nacionalne strategije;
- y) vrši nadzor i prati izvršenje svih ugovora koje zaključuje Federalno ministarstvo.

(2) Federalna uprava priprema godišnji plan rada, finansijske planove i izvještaje o izvršenim radovima i iste, putem Federalnog ministarstva, dostavlja Vladi Federacije BiH.

### **Član 67. (Čuvanje šuma)**

(1) Federalna uprava je dužna obezbjediti neposrednu zaštitu državnih šuma i šumskog zemljišta – čuvanje šuma od šumskih požara i drugih elementarnih nepogoda, biljnih bolesti i štetočina, bespravnog prisvajanja i korištenja, kao i drugih protivzakonitih radnji, putem organizovane čuvarske službe.

(2) Čuvarska služba iz stava 1. ovog člana formira se unutar Federalne uprave po određenim čuvarskim reonima. Čuvarsku službu obavljaju stručna lica (u daljem tekstu čuvari šuma) koja za to ovlasti Federalna uprava.

(3) Čuvari šume mogu biti lica koja su završila srednju šumarsku školu III ili IV stepen, koja ispunjavaju uslove za nošenje oružja i druge uslove za obavljanje javne službe i koja imaju odgovarajuću licencu za obavljanje specifičnih poslova u šumarstvu

(4) Čuvari šuma su ovlaštene službene osobe i imaju javna ovlaštenja.

(5) Čuvari šuma službu obavljaju u uniformi, moraju biti naoružani i moraju posjedovati dokument – legitimaciju čuvara šuma kojim potvrđuju status čuvara šuma. Legitimaciju imaju i druga stručna lica koja imaju ovlaštenje za poslove zaštite šuma.

(6) Dužnosti čuvara šuma su da:

- a) čuva šumu od šumskih požara na način kako je utvrđeno ovim zakonom i planovima zaštite šuma od požara;
- b) čuva šumu i šumska zemljišta od bespravnog zauzimanja i korištenja, od bespravnih sječa, sprječava bespravnu izgradnju u šumi i na šumskim zemljištima;
- c) evidentira bespravno posječena stabla u propisane obrasce i obilježava ih;
- d) prati pojave i kretanje biljnih bolesti i štetočina i štete nanesene šumi od divljači;
- e) prati stanje divljači;
- f) prati održavanje šumskog reda;
- g) sprječava nezakonito pokretanje drveta iz šume, ubiranje i sakupljanje nedrvnih proizvoda i stavljanje istih u promet;
- h) zaustavlja prijevozna sredstva i pregleda prateću dokumentaciju za prijevoz šumskih sortimenata;
- i) pregleda porijeklo drveta u pogonima za preradu drveta i na svim drugim mjestima gdje se drvo drži;
- j) pregleda sav transport na šumskim putevima;

- k) sprječava istresanje i deponovanje (odlaganje) smeća i drugog otpada u šumu i uništavanje graničnih znakova;
- l) sačinjava zapisnik o protivpravnoj radnji sa neophodnim podacima o izvršenoj radnji, izvršiocima i visini štete;
- m) legitimira sva lica zatečena u vršenju prekršajnih radnji po ovom zakonu i krivičnih djela koja se odnose na šume ili za koja postoji osnovana sumnja da su izvršila takva djela, ako se ne može utvrditi identitet tih lica na drugi način;
- n) obavještava Federalnu upravu, policijsku upravu i nadležnu šumarsku inspekciju o svim zapaženim nepravilnostima.

(7) Za sve bespravne aktivnosti u skladu sa svojim dužnostima iz stava 6. ovog člana, čuvar šuma obavezan je bez odlaganja sačiniti zapisnik o protivpravnoj radnji sa neophodnim podacima i podnijeti prekršajni nalog odnosno putem Federalne uprave zahtjev za pokretanje postupka nadležnom sudu ili tužilaštvu.

(8) Svako lice je dužno da na zahtjev čuvara šuma pokaže lične isprave kojim se utvrđuju njegov identitet i isprave za drvo i ostale šumske proizvode u prevozu ili uskladištene.

(9) Federalni ministar donosi pravilnik o načinu izvršavanja zadataka, obliku i sadržaju legitimacije čuvara šuma, izgledu uniforme i općim kriterijima za utvrđivanje čuvarskih reona.

#### **Član 68.** **(Direktor Federalne uprave)**

(1) Vlada Federacije BiH putem javnog konkursa bira i imenuje direktora Federalne uprave.

(1) Za direktora Federalne uprave pored općih uslova (Zakon o vladinim i ministarskim imenovanjima) može se imenovati samo stručnjak iz oblasti šumarstva, diplomirani inženjer šumarstva/master šumarstva sa najmanje deset godina radnog iskustva u sektoru šumarstva i značajnim postignućima u oblasti šumarske struke ili nauke.

### **VIII. FINANSIRANJE**

#### **Član 69.** **(Namjenska sredstva)**

(1) Radi ostvarivanja opšteg interesa i dugoročnih ciljeva zasnovanih na principima održivog gospodarenja šumama utvrđenih Šumarskim programom Federacije, kantonalnim šumsko-razvojnim planovima i šumsko privrednim osnovama ustanovljavaju se finansijska sredstva za zaštitu i unapređenje stanja postojećih i podizanja novih šuma i za ruralni razvoj.

(2) Sredstva iz stava 1. ovog člana obezbjeđuju se iz:

- a) naknada za obavljanje stručnih poslova u privatnim šumama iz člana 51. stav 7. ovog Zakona;
- b) naknada za korištenje državnih šuma iz člana 54. i člana 70. ovog zakona;
- c) naknada u postupku promjene namjene šuma i šumskog zemljišta iz člana 61. ovog Zakona;
- d) naknada iz člana 60. stav 4. ovog Zakona;

- e) naknada iz člana 61. stav 9. ovog Zakona;
- f) naknada iz člana 63. stav 5. ovog Zakona;
- g) naknada iz člana 64. stav 4. ovog Zakona;
- h) naknada za općekorisne funkcije šuma iz člana 71. ovog zakona;
- i) ostalih izvora u skladu sa ovim zakonom i drugih izvora.

(3) Sredstva iz stava 2. ovog člana uplaćuju se na poseban račun Budžeta Federacije, budžeta kantona i budžeta jedinice lokalne samouprave.

(4) Sredstvima sa posebnih računa iz stava 3. ovog člana raspolažu federalni ministar, direktor Federalne uprave, kantonalni ministar i općinski načelnik.

(5) Federalni ministar po prethodno pribavljenom mišljenju federalnog ministra finansija/finansija donosi pravilnik kojim se propisuje izgled i sadržaj obrasca za obračun uplate prihoda iz stava 2. ovog člana.

(6) Uplata prihoda iz stava 2. ovog člana, tč. od b) do g) vrši se u skladu sa propisima Federalnog ministarstva finansija/finansija o načinu uplate javnih prihoda budžeta i vanbudžetskih fondova na teritoriji Federacije BiH.

## **Član 70.** **(Uplata naknade za korištenje šuma)**

(1) Naknada za korištenje državnih šuma iz člana 54. obračunava se od ostvarenog prihoda od drveta računajući cijenu drveta na panju i prihoda ostvarenog od nedrvnih šumskih proizvoda po jedinstvenom cjenovniku šumskih proizvoda koji donosi Federalna uprava i uplaćuje se u sljedećim iznosima:

- a) 1,0 % na poseban račun budžeta Federacije;
- b) 1,0 % na poseban račun budžeta Kantona;
- c) 5,0 % na namjenski račun jedinice lokalne samouprave na čijoj teritoriji se ostvaruje prihod.

(2) Po izradi ekspertize od strane visokoškolske naučno-istraživačke ustanove iz oblasti šumarstva iz stava 2. člana 54. ovog Zakona i određivanja visine naknade za korištenje šuma za svako pojedinačno šumsko privredno područje u Federaciji od strane Federalnog ministra, uplata naknada za korištenje državnih šuma iz stava 1. ovog člana će se uplaćivati na sljedeći način:

- a) 15 % na poseban račun budžeta Federacije;
- b) 15 % na poseban račun budžeta Kantona;
- c) 70 % na namjenski račun jedinice lokalne samouprave na čijoj teritoriji se ostvaruje prihod.

(3) Sa danom primjene odredbi iz stava 2. ovog člana prestaje primjena odredi stava 1. ovog člana.

(4) Naknada iz stava 1. ovog člana uplaćuje se tromjesečno i po završnom godišnjem računovodstvenom izvještaju.

(5) Kontrolu obračuna i uplate naknade iz stava 1. ovog člana vrši nadležna šumarska inspekcija.

(6) Ako obveznik plaćanja naknade ne obračuna ili ne uplati naknadu iz stava 1. ovog člana, inspektor koji je izvršio kontrolu uplate sredstava podnosi kod nadležnog suda prijedlog za prinudno izvršenje ove novčane obaveze, po

pravosnažnosti i izvršnosti rješenja o uplati sredstava koje je ispostavio obvezniku.

### **Član 71. (Naknada za općekorisne funkcije šuma)**

(1) Naknada za općekorisne funkcije šuma plaćaju sva pravna lica koja su registrovana za obavljanje djelatnosti na teritoriji Federacije kao i djelovi pravnih lica čije je sjedište van Federacije, a obavljaju djelatnost na teritoriji Federacije, u visini od 0,07 % ukupno ostvarenog prihoda.

(2) Naknada iz stava 1. ovog člana uplaćuje se tromjesečno i po završnom godišnjem računovodstvenom izvještaju prema mjestu ostvarenog prihoda.

(3) Naknada iz stava 1. ovog člana uplaćuje se na poseban račun Federalne uprave u okviru trezora Budžeta Federacije BiH.

(4) Od obaveze plaćanja naknade iz stava 1. ovog člana izuzimaju se: korisnici državnih šuma, javne institucije, humanitarne organizacije, udruženja i fondacije izuzev onih koji obavljaju djelatnost radi sticanja dobiti.

(5) Obaveza uplate naknade iz stava 1. ovog člana zastarjeva u roku od 10 godina od proteka godine u kojoj je obaveza nastala.

(6) Kontrolu obračuna i uplate naknade iz stava 1. ovog člana vrše Porezna uprava i šumarska inspekcija.

(7) Ako obveznik plaćanja naknade ne obračuna ili ne uplati naknadu iz stava 1. ovog člana, inspektor koji je izvršio kontrolu uplate sredstava podnosi kod nadležnog suda prijedlog za prinudno izvršenje ove novčane obaveze, po pravosnažnosti i izvršnosti rješenja o uplati sredstava koje je ispostavio obvezniku.

### **Član 72. (Korištenje namjenskih sredstava Federacije)**

(1) Iz namjenskih sredstava Budžeta Federacije BiH prikupljenih po osnovu člana 69. stav 2. ovog Zakona finansira i/ili sufinansira se:

- a) izrada i revizija Šumarskog programa Federacije;
- b) kontinuirane inventure šuma na velikim površinama;
- c) rad čuvarske službe;
- d) izrada šumsko-privrednih osnova za državne i privatne šume;
- e) nadzor nad prikupljanjem podataka za izradu šumsko-privrednih osnova za državne i privatne šume;
- f) biološke reprodukcije šuma u obimu većem od onog koji je predviđen šumsko-privrednom osnovom;
- g) obnove šuma od posljedica elementarnih nepogoda, prenamnoženja insekata, požara i slično;
- h) unapređenja proizvodnje šumskog reprodukcionog materijala;
- i) gospodarenje šumama koje su od vitalnog interesa u skladu sa članom 29. stav 2. ovog Zakona;
- j) očuvanje i unapređenje genofonda rijetkih i ugroženih vrsta šumskog drveća;
- k) očuvanja i unapređenja bioraznolikosti šumske flore i faune;
- l) pošumljavanje krša i produktivnih a neobraslih šumskih zemljišta;
- m) provođenje procesa deminiranja šuma i šumskog zemljišta;
- n) izgradnja, održavanje i unaprjeđenje šumske putne infrastrukture;

- o) sufinansiranja tehničkih specijalističkih kurseva;
- p) naučna istraživanja i stručne analize;
- q) razvoj i unaprjeđenje jedinstvenog informacionog sistema u šumarstvu;
- r) primjena međunarodnih standarda certificiranja kod upravljanja i gazdovanja šumskim ekosistemima;
- s) kupovina šuma i šumskog zemljišta;
- t) druge namjene za unaprjeđenje šuma.

(2) Federalna uprava priprema program utroška sredstava u skladu sa stavom 1. ovog Člana na osnovu kriterija za dodjelu namjenskih sredstava Federacije i dostavlja ga Vladi Federacije. Prilikom pripreme programa Federalna uprava će poštovati Izvedbeni dio Šumarskog programa Federacije i iznos sredstava utvrđenih Budžetom Federacije BiH u tekućoj godini za te namjene.

(3) Federalni ministar donosi pravilnik kojim se utvrđuje postupak i kriteriji za dodjelu namjenskih sredstava u oblasti šumarstva iz Budžeta Federacije BiH.

### **Član 73.**

#### **(Korištenje namjenskih sredstava kantona)**

(1) Iz namjenskih sredstava budžeta kantona prikupljenih po osnovu člana 69. stav 2. ovog Zakona, finansira i/ili sufinansira se:

- a) izrada i revizija kantonalnog šumsko-razvojnog plana;
- b) obnove šuma od posljedica elementarnih nepogoda, prenamnoženja insekata, požara i slično;
- c) biološke reprodukcije šuma u obimu većem od onog koji je predviđen šumsko privrednom osnovom;
- d) očuvanja i unaprjeđenja diverziteta šumskih ekosistema;
- e) pošumljavanje krša i produktivnih a neobraslih šumskih zemljišta;
- f) provođenje procesa deminiranja šuma i šumskog zemljišta;
- g) izgradnja, održavanje i unaprjeđenje šumske putne infrastrukture;
- h) kupovina šuma i šumskog zemljišta;
- i) druge namjene za unaprjeđenje šuma.

(2) Kantonalni ministar donosi pravilnik kojim se propisuje postupak i kriteriji za dodjelu namjenskih sredstava u oblasti šumarstva iz budžeta kantona.

### **Član 74.**

#### **(Korištenje namjenskih sredstava jedinica lokalne samouprave)**

(6) Sredstva iz člana 70. stav 1. tačka c) ovog Zakona koriste se za izgradnju, rekonstrukciju i održavanje infrastrukture na području jedinice lokalne samouprave.

(7) Ukoliko jedinica lokalne samouprave ocijeni potrebnim, u skladu sa mogućnostima mogu se finansirati/sufinansirati i svi poslovi predviđeni Članom 72.i 73.ovog Zakona a u svrhu očuvanja i unaprjeđenja šumskih ekosistema;

(8) Predstavničko tijelo jedinice lokalne samouprave donosi plan o utrošku namjenskih sredstava, prije donošenja ovog plana sredstva se ne mogu trošiti.



## **IX. NADZOR NAD SPROVOĐENJEM OVOG ZAKONA**

### **Član 75. (Upravni nadzor)**

(1) Federalno ministarstvo vrši nadzor nad primjenom ovog Zakona i propisa donesenih na osnovu ovog Zakona koji su ovim zakonom stavljeni u nadležnost Federacije, kao i upravni nadzor nad obavljanjem poslova određenih ovim zakonom koji predstavljaju vršenje javnih ovlaštenja.

(2) U vršenju nadzora nad izvršavanjem poslova u vršenju javnih ovlaštenja, iz stava 1. ovog člana, Federalno ministarstvo ostvaruje neposredan uvid i kontrolu u postupanju, vrši pregled akata i dokumentacije koju donose institucije i upravne organizacije u vršenju javnih ovlaštenja, daje instrukcije i smjernice za izvršavanje poslova i traži podatke i obavještenja o izvršavanju poslova u vršenju javnih ovlaštenja.

(3) Federalno ministarstvo vrši i upravni nadzor nad kantonalnim ministarstvima u dijelu izvršenja federalne politike u oblasti očuvanja i zaštite šuma, planiranja i upravljanja šumama i finansiranja obnove i unapređenja šuma na teritoriji Federacije.

(4) Upravni nadzor nad organima uprave i institucijama koje vrše javna ovlaštenja vrši se u žalbenom postupku i putem ovlaštenja drugostepenog organa i po službenoj dužnosti.

(5) Kantonalna ministarstva vrše upravni nadzor nad provođenjem ovog Zakona i propisa donesenih na osnovu ovog Zakona koji su ovim zakonom stavljeni u nadležnost kantona kao i upravni nadzor nad obavljanjem poslova određenih ovim zakonom koji predstavljaju vršenje javnih ovlaštenja, a stavljeni su u nadležnost kantona.

### **Član 76. (Inspeksijski nadzor)**

(1) Inspeksijski nadzor u provođenju ovog Zakona i propisa donesenih na osnovu ovog Zakona vrše federalna šumarska inspekcija i kantonalne šumarske inspekcije.

(2) Inspeksijski nadzor se vrši u skladu sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05) i Zakonom o inspekcijama u Federaciji BiH („Službene novine Federacije BiH“, broj 69/05) - (u daljem tekstu: Zakon o inspekcijama).

(3) Inspeksijski nadzor nad primjenom ovog Zakona neposredno obavljaju federalni i kantonalni šumarski inspektori/inspektorice kao državni službenici sa posebnim ovlaštenjima i odgovornostima (u daljem tekstu: šumarska inspekcija).

### **Član 77. (Federalna šumarska inspekcija i kantonalna šumarska inspekcija)**

(1) Federalna šumarska inspekcija može neposredno obaviti poslove iz nadležnosti kantonalne šumarske inspekcije, kada ocijeni da se na drugi način ne mogu provesti odredbe ovog Zakona ili drugi propisi doneseni na osnovu njega, a nadležna kantonalna šumarska inspekcija nije obavila inspeksijski nadzor u za to naloženom roku ili nije završila postupak u roku.

(2) Kantonalna šumarska inspekcija može po ovlaštenju i nalogu federalne šumarske inspekcije, izvršiti inspekcijски nadzor iz nadležnosti federalne šumarske inspekcije.

### **Član 78. (Uslovi za imenovanje šumarskog inspektora)**

Za federalnog šumarskog inspektora i kantonalnog šumarskog inspektora može se imenovati lice koje:

- a) ima visoku stručnu spremu VII stepen šumarske struke (diplomirani inženjer šumarstva/master šumarstva);
- b) ima položen stručni upravni ispit za rad u organima uprave, odnosno položen ispit općeg znanja predviđen za državne službenike organa uprave u Federaciji ili javni ispit predviđen za državne službenike institucija Bosne i Hercegovine;
- c) ima najmanje pet godina radnog staža u struci.

### **Član 79. (Ovlaštenja federalnog šumarskog inspektora)**

Pored ovlaštenja i dužnosti određenih Zakonom o inspekcijama, šumarski inspektor je ovlašten i dužan da:

- a) pregleda šumsko privredne osnove, godišnje planove gospodarenja, šumsko razvojne planove i programe, izvedbene projekte, planove biološke obnove šuma i planove zaštite šuma, kontroliše njihovo izvršenje, poslovne knjige i ostalu dokumentaciju;
- b) pregleda sve radove koji se obavljaju u šumi, objekte, uređaje, pogone za preradu drveta, kao i sva mjesta gdje se drvo sječe, smješta, prerađuje, izvozi iz šume ili stavlja u promet;
- c) privremeno obustavi sječe i sve druge radnje koje nisu u skladu sa odredbama ovog Zakona i drugih propisa iz oblasti šumarstva, do konačne odluke nadležnog organa;
- d) zaustavlja prijevozna sredstva i pregleda prateću dokumentaciju za prevoz šumskih sortimenata i nedrvnih šumskih proizvoda na regionalnim i magistralnim putevima;
- e) pregleda izvršenje svih radova koji su predviđeni šumsko privrednom osnovom, godišnjim planom;
- f) u hitnim slučajevima u kojima bi mogla nastupiti šteta po opšti interes, na licu mjesta rješenjem naređuje obustavu rada i provođenje mjera za sprječavanje šteta;
- g) privremeno oduzima bespravno posječeno drvo i drvo nezakonito stavljeno u promet i nedrvne šumske proizvode;
- h) pregleda provođenje mjera na zaštiti šuma i šumskih zemljišta od protivpravnog prisvajanja i korištenja i bespravne izgradnje objekata i po potrebi preduzima odgovarajuće mjere;
- i) vrši nadzor nad provođenjem propisa o proizvodnji i prometu šumskog sjemena i šumskog sadnog materijala;
- j) vrši nadzor nad provođenjem i drugih mjera za zaštitu šuma i propisnog uspostavljanja i održavanja šumskog reda;

- k) pokreće i vodi inspekcijski nadzor po službenoj dužnosti kao i po zahtjevu svih pravnih i fizičkih lica i o utvrđenom stanju i preduzetim mjerama pismeno obavještava podnosioca zahtjeva;
- l) upoznaje javnost sa utvrđenim stanjem šuma i o preduzetim mjerama na otklanjanju nedostataka;
- m) saraduje sa inspekcijskim organima iz drugih oblasti, pravosudnim organima i organima policije;
- n) vrši kontrolu obračuna i uplate naknade iz člana 70. i 71. ovog Zakona.
- o) preduzima i druge mjere i radnje za koje je ovlašten ovim zakonom i drugim propisima;

### **Član 80.** **(Ovlaštenja kantonalnog šumarskog inspektora)**

(1) Pored ovlaštenja i dužnosti određenih Zakonom o inspekcijama, šumarski inspektor je ovlašten i dužan da:

- a) pregleda izvedbene projekte, planove biološke obnove šuma i planove zaštite šuma, kontroliše njihovo izvršenje, poslovne knjige i ostalu dokumentaciju;
- b) pregleda sve radove koji se obavljaju u šumi, objekte, uređaje, pogone za preradu drveta, kao i sva mjesta gdje se drvo sječe, smješta, prerađuje, izvozi iz šume ili stavlja u promet na području kantona;
- c) privremeno obustavi sječe i sve druge radnje koje nisu u skladu sa odredbama ovog Zakona i drugih propisa iz oblasti šumarstva, do konačne odluke nadležnog organa;
- d) pregleda odabiranje i doznaku stabala za sječu;
- e) zaustavlja prijevozna sredstva i pregleda prateću dokumentaciju za prevoz šumskih sortimenata i nedrvnih šumskih proizvoda na šumskim, lokalnim i regionalnim putevima;
- f) pregleda izvršenje svih radova koji su predviđeni projektima za izvođenje;
- g) u hitnim slučajevima u kojima bi mogla nastupiti šteta po opšti interes, na licu mjesta rješenjem naređuje obustavu rada i provođenje mjera za sprječavanje šteta;
- h) privremeno oduzima bespravno posječeno drvo i drvo nezakonito stavljeno u promet i nedrvne šumske proizvode;
- i) pregleda kako se provodi utvrđivanje zdravstvenog stanja šuma i mjera za suzbijanje biljnih bolesti i štetočina i naređuje otklanjanje nedostataka i provođenje mjera, ako se utvrdi da se pravna lica koja gospodare državnim šumama i vlasnici šuma ne pridržavaju propisa i mjera zdravstvene zaštite;
- j) pregleda planove zaštite šuma od požara i provođenje planiranih mjera i naredi otklanjanje nedostataka;
- k) pregleda provođenje mjera na zaštiti šuma i šumskih zemljišta od protivpravnog prisvajanja i korištenja i bespravne izgradnje objekata i po potrebi preduzima odgovarajuće mjere;
- l) vrši nadzor nad provođenjem i drugih mjera za zaštitu šuma i propisnog uspostavljanja i održavanja šumskog reda i vršenja neposrednog čuvanja šuma;
- m) prikuplja potrebne podatke i obavještenja od odgovornih lica, svjedoka, vještaka i drugih lica kada je to potrebno za vršenje nadzora;
- n) pokreće i vodi inspekcijski nadzor po službenoj dužnosti kao i po zahtjevu svih pravnih i fizičkih lica i o utvrđenom stanju i preduzetim mjerama pismeno obavještava podnosioca zahtjeva;

- o) saraduje sa inspekcijskim organima iz drugih oblasti, pravosudnim organima i organima policije;
- p) vrši kontrolu obračuna i uplate naknade iz člana 70. i 71. ovog Zakona.
- q) preduzima i druge mjere i radnje za koje je ovlašten ovim zakonom i drugim propisima;

(2) Kantonalni šumarski inspektori su, pored navedenog, dužni da na propisan način dostavljaju izvještaje i potrebne podatke federalnom šumarskom inspektoratu.

## **Član 81.**

### **(Plan i program rada šumarske inspekcije)**

(1) Šumarska inspekcija u skladu sa odredbama člana 27. Zakona o inspekcijama donosi godišnje programe rada i mjesečne planove rada obavljanja inspekcijskih nadzora.

(2) Pri izradi godišnjih programa i planova, federalna šumarska inspekcija mora tražiti mišljenje Federalnog ministarstva, a kantonalna šumarska inspekcija mora tražiti mišljenje kantonalnog ministarstva.

(3) Glavni federalni šumarski inspektor podnosi mjesečni izvještaj o izvršenim inspekcijskim pregledima i preduzetim mjerama u oblasti šumarstva direktoru Federalne uprave za inspekcijske poslove.

(4) Glavni kantonalni šumarski inspektor podnosi mjesečne izvještaje direktoru kantonalne uprave za inspekcijske poslove vezano za izvršeni inspekcijski nadzor i preduzetim mjerama iz oblasti šumarstva.

(5) Federalna šumarska inspekcija u saradnji sa kantonalnim šumarskim inspekcijama jednom godišnje na osnovu svojih nalaza i prikupljenih podataka sastavlja cjelovit izvještaj o stanju šuma i stanju u oblasti šumarstva. Ovako pripremljen izvještaj dostavlja se Federalnom ministru i o istom informiše javnost.

## **Član 82.**

### **(Provođenje inspekcijskog nadzora)**

(1) Šumarski inspektor u obavljanju poslova inspekcijskog nadzora o utvrđenim činjenicama sačinjava zapisnik.

(2) Ako šumarski inspektor prilikom vršenja inspekcijskog nadzora ustanovi da ovaj zakon i podzakonski propis donesen na osnovu njega nisu primjenjeni ili da su nepravilno primjenjeni postupiće u skladu sa odredbama Zakona o upravnom postupku („Službene novine Federacije BiH“, broj 2/98 i 48/99), Zakona o inspekcijama ili drugog zakona koji propisuju izricanje odgovarajuće upravne mjere i odrediti rok za njeno izvršenje.

(3) Protiv rješenja federalnog šumarskog inspektora može se izjaviti žalba Federalnom ministarstvu u roku osam dana od prijema rješenja.

(4) Žalba na rješenje federalnog šumarskog inspektora ne odlaže izvršenje rješenja osim u hitnim slučajevima ako bi izvršenjem rješenja bili ugroženi životi i zdravlje ljudi odnosno ako bi nastupila znatna materijalna šteta.

(5) Rješenje po žalbi iz stava 3. ovog člana je konačno i protiv njega nije dopuštena žalba, ali se može pokrenuti upravni spor kod kantonalnog suda prema sjedištu prvostepenog organa.

(6) Protiv rješenja kantonalnog šumarskog inspektora može se izjaviti žalba kanonalnom ministarstvu u roku od osam dana od dana prijema rješenja.

(7) Žalba na rješenje kantonalnog šumarskog inspektora ne odlaže izvršenje rješenja osim u hitnim slučajevima ako bi izvršenjem rješenja bili ugroženi životi i zdravlje ljudi odnosno ako bi nastupila znatna materijalna šteta.

(8) Rješenje po žalbi iz stava 6. ovog člana je konačno i protiv njega nije dopuštena žalba, ali se može pokrenuti upravni spor kod kantonalnog suda prema sjedištu prvostepenog organa.

(9) Pokretanje upravnog spora na rješenje iz stava 8. ovog člana ne odlaže izvršenje rješenja.

### **Član 83. (Odgoda izvršenja obaveza)**

(1) Glavni federalni šumarski inspektor može uz obrazloženje žaliloca, odložiti izvršenje naloženih mjera, ako žalilac učini vjerovatnim da bi usljed izvršenja tih mjera bili ugroženi životi i zdravlje ljudi, nastupila znatna materijalna šteta na šumi i šumskom zemljištu i drugih dobara koja se na drugi način ne može otkloniti, a odlaganje se ne protivi općem interesu.

(2) Glavni federalni šumarski inspektor može na prijedlog obveznika uplate naknade za općekorisne funkcije šuma odobriti uplatu zaostalih sredstava po ovom osnovu prema potpisanom sporazumu sa obveznikom uplate u ratama, ako obveznik učini vjerovatnim da u trenutku kontrole ne raspolaže novčanim sredstvima za izvršenje ove obaveze.

### **Član 84. (Obaveze šumarskog inspektora)**

(1) Šumarski inspektor dužan je uvijek kada utvrdi da je učinjeno djelo koje ima obilježje prekršaja propisanog ovim zakonom podnijeti prekršajni nalog ili zahtjev nadležnom sudu za pokretanje prekršajnog postupka.

(2) Šumarski inspektor dužan je uvijek kada utvrdi da je učinjeno djelo koje ima obilježje krivičnog djela čija su obilježja propisana Krivičnim zakonom („Službene novine Federacije BiH“, br: 36/03, 37/03, 21/04, 69/04 i 18/05.....) podnijeti pisanu prijavu nadležnom tužilaštvu.

### **Član 85. (Legitimacija šumarskog inspektora)**

(1) Federalni šumarski inspektori i kantonalni šumarski inspektori imaju službenu legitimaciju kojom dokazuju identitet i službena ovlaštenja.

(2) Oblik i sadržaj službene legitimacije šumarskog inspektora propisuje Federalno ministarstvo pravde, a uručuje rukovodilac organa.

## **X. KAZNENE ODREDBE**

### **Član 86.**

Novčanom kaznom od 12.000 do 15.000 KM kaznit će se korisnik šuma ili drugo pravno lice ako:

1. gospodari šumama bez šumsko privredne osnove, godišnjeg plana gospodarenja i projekta za izvođenje (član 9. st. 1. i 3.);
2. prekorači ukupan obim sječa u visokim šumama sa prirodnom obnovom predviđen na godišnjem nivou a u skladu sa šumsko privrednom osnovom (član 9. stav 4. i 5. );
3. prije isteka važeće ne izradi i dostavi novu šumsko privrednu osnovu (član 10. stav 4.);
4. izradi projekat za izvođenje suprotno odredbama člana 13. stav 2.;
5. ne izradi i ne donese projekat za izvođenje i ne odredi lice za realizaciju projekta (član 13. st. 5. i 8.);
6. vrši sječū šume suprotno odredbama člana 15. stav 1.;
7. ne obavlja poslove biološke obnove šuma (član 16.);
8. ne izradi planove zaštite šuma od požara (član 34. stav 6.);
9. u šumi vrši upotrebu hemijskih sredstava suprotno odredbama člana 35. st. 1. i 3.;
10. vrši ili dozvoli iskorištavanje nedrvnih šumskih proizvoda suprotno odredbama člana 38. st. 1. i 3.;
11. izgradi šumski put suprotno odredbama člana 41. stav 4.;
12. ako prenese na treća lica prava koja proističu po osnovu ugovora(član 52. stav 6.)
13. izvrši ili dozvoli krčenje šume prije nego se izda dozvola za krčenje (član 61. stav 2.);
14. u šumi ili na šumskom zemljištu podigne ili dozvoli podizanje objekata suprotno odredbama člana 62. stav 2.;

Za prekršaj iz stava 1. ovog člana kaznit će se novčanom kaznom u iznosu od 2.500 do 3.000 KM i odgovorno lice u pravnom licu.

### **Član 87.**

Novčanom kaznom od 10.000 do 12.000 KM kaznit će se za prekršaj korisnik šuma ili drugo pravno lice ako:

1. vrši doznaka i sječa stabala u dijelovima šume za koje imovinsko-pravni odnosi nisu rješeni i granice utvrđene i na terenu vidno i na propisan način obilježene (član 14. stav 3.)
2. angažuje zaposlenike suprotno odredbama člana 18. stav 1.;
3. dozvoli ili vrši čistu sječū ili pustošenje šuma (član 20. stav 1.);
4. koristi šumsko sjeme suprotno odredbama člana 22. stav 3.;
5. ne izvrši sanitarne sječe i radnje iz člana 24. st. 1. i 3.;
6. ne vodi propisanu evidenciju i stavlja u promet drvne sortimente u suprotnosti sa pravilnikom iz člana 26. stav 10.;
7. loži ili dozvoli loženje vatre suprotno odredbama člana 34. stav 1.;

8. odlaže ili dozvoli odlaganje smeća i zagađujućih tvari u šumi (član 35. stav 4.);
9. ne prati zdravstveno stanje šuma (član 37. stav 1.);
10. vrši ili dozvoli uzgoj divljači u šumi suprotno odredbama člana 39. stav 1.;
11. izgradi šumsku infrastrukturu suprotno odredbama člana 41. stav 3.;
12. vrši promet šuma i šumskog zemljišta suprotno odredbama člana 49. st. 1., 2., 3., 4. i 5.;
13. ne izvršava poslove u skladu sa članom 50. stav 4.;
14. ne izvrši obaveze iz člana 70.;
15. ne izvrši obavezu iz člana 71.;
16. ne postupi po rješenju šumarskog inspektora (član 82. stav 2.);
17. ako ne vrši uplatu u skladu sa sporazumom iz člana 83. stav 2.;
18. ako ne uskladi poslovanje sa odredbama ovog Zakona (član. 96. stav 1.)

Za prekršaj iz stava 1. ovog člana kaznit će novčanom kaznom u iznosu od 2.000 do 3.000 KM odgovorno lice u pravnom licu.

### **Član 88.**

Novčanom kaznom u iznosu od 5.000 do 10.000 KM kaznit će se za prekršaj korisnik šume ili drugo pravno lice ako:

1. vrši radove bez saglasnosti Federalne uprave (član 12. stav 4.);
2. ne dostavi godišnji plan gospodarenja (član 12. stav 5.);
3. u roku od dvije godine ne izvrši radove predviđene projektom za izvođenje i ne vodi registar projekata (član 13. st. 3. i 10.);
4. ne izvrši tehnički prijem radova i ostale obaveze u skladu sa odredbama člana 17.;
5. ne obezbijedi mjere zaštite u skladu sa odredbama člana 18. stav 2.;
6. ne izvrši pošumljavanje sječina u roku od dvije godine i ne ucrtta na karti i obilježi na terenu površine za prirodnu obnovu (član 21. st. 1. i 3.);
7. ne izradi plan u skladu sa članom 25stav 1.;
8. pokreće drvo, dijelove stabala i grane ili stavlja u promet drvo koje nije žigosano i snabdjeveno otpremnim iskazom (član 26. stav 1.);
9. stavlja u promet nedrvne šumske proizvode bez odobrenja (član 26. stav 3.);
10. zatekne, izvrši ili dozvoli sječju, ne izvrši zapljenu drveta i stavlja drvo u promet, suprotno odredbama člana 26. st. 5. i 6.;
11. u periodu vegetacije od 01. aprila do 01. novembra, drvo četinara i brijesta uskladištava i stavlja u promet suprotno članu 26. stav 8. i 9;
12. ne gospodari zaštitnim šumama i šumama sa posebnom namjenom shodno aktu o proglašenju i ne obilježi zaštitne šume i šume sa posebnom namjenom vidljivim znakovima (član 27. st. 1. 3. i 6.);
13. vrši ili dozvoli pašu, žirenje, brst, kresanje lisnika, ne odredi i ne obilježi puteve za progon stoke (član 36. st. 1. i 3.);
14. vrši ili dozvoli sječju pančićeve omorike, tise, mečije lijeske, planinskog javora, planinskog bora, zelene johe, munike i zanovijeti suprotno odredbama člana 40.;
15. odobri korištenje šumskih puteva suprotno odredbama člana 42. stav 2.;
16. počini ili dopusti neovlašteno zauzimanje šuma ili šumskog zemljišta (član 48.)
17. ne vodi evidencije o izvršenim radovima i provedenim mjerama predviđenim kantonalnim šumsko-razvojnim planom, šumsko privrednom osnovom,

- godišnjim planom gospodarenja i projektima za izvođenje i ne evidentira ih u predviđenom roku (član 53. stav 2.);
18. u roku od dvije godine zemljište ne privede namjeni radi koje je krčenje izvršeno ili ne izvrši njegovo pošumljavanje (član 61. stav 8.);
  19. ne vrši uplatu sredstava u Budžet Federacije BiH, budžet kantona i budžet jedinica lokalne samouprave u skladu sa odredbama člana 69.;
- Za prekršaj iz stava 1. ovog člana kaznit će se novčanom kaznom u visini od 2.000 do 3.000 KM i odgovorno lice u pravnom licu.

### **Član 89.**

Novčanom kaznom u iznosu od 200 – 1.500 KM kaznit će se za prekršaj fizičko lice ako:

1. vrši šumsko - uzgojne radove i sječu šume suprotno odredbama člana 13. stav 7.;
2. vrši sječu bez prethodno izdatog rješenja i doznake (član 14. stav 4.);
3. vrši sječu šume suprotno odredbama člana 15. stav 1.;
4. ne izvrši pošumljavanje sječina u roku od dvije godine i ne obilježi na terenu površine za prirodnu obnovu (član 21. st. 1. i 3.);
5. ne izvrši sanitarnu sječu i ne uspostavi i održava šumski red (član 24. st. 1. i 3. tačka d.);
6. otprema iz šume ili stavlja u promet drvo bez žigosanja i otpremnog iskaza (član 25. stav 1.);
7. stavlja u promet nedrvne šumske proizvode bez odobrenja (član 26. stav 3.);
8. vrši sječu bez doznake na uzurpiranoj državnoj šumi (član 26. stav 5.);
9. ne gospodari zaštitnim šumama i šumama sa posebnom namjenom shodno aktu o proglašenju i ne obilježi zaštitne šume i šume sa posebnom namjenom vidljivim znakovima (član 27. st. 1. 3. i 6.);
10. loži vatru suprotno odredbama člana 34. stav 1.;
11. u šumi odlaže smeće i zagađujuće tvari (član 35. st. 1 i 4.);
12. pušta stoku na pašu, žirenje i na pojila bez nadzora čuvara stoke i mimo utvrđenih puteva (član 36. st. 2. i 3.);
13. vrši ili dozvoli sječu pančičeve omorike, tise, lijeske mečije, planinskog javora, planinskog bora, zelene johe, munike i zanovijeti suprotno odredbama člana 40.;
14. vrši kretanje motornim vozilima u šumama i na šumskim zemljištima suprotno odredbama člana 42.;
15. u šumama vrši radnje suprotno odredbama člana 43. stav 2.;
16. počini neovlašteno zauzimanje šuma ili šumskoga zemljišta (član 48.)
17. nanosi štetu susjednim parcelama (član 57. stav 1.);
18. izvrši krčenje šume prije nego se izda dozvola za krčenje (član 61. stav 3. )
19. vrši izgradnju zgrada i drugih objekata suprotno odredbama člana 62. st. 1. i 5.);
20. na zahtjev čuvara šuma ne pokaže lične isprave ili isprave za šumske proizvode (član 67. stav 8.);
21. ne postupi po rješenju šumarskog inspektora (član 82. stav 2.)



## **XI. PRELAZNE I ZAVRŠNE ODREDBE**

### **Član 90.**

Vlada Federacije BiH će svojim aktom propisati način uknjižbe šuma i šumskog zemljišta u državnom vlasništvu.

### **Član 91.**

- (1) Federalna uprava je dužna da preuzme poslove date u nadležnost ovim zakonom u roku od šest mjeseci od dana stupanja na snagu ovog zakona.
- (2) Danom preuzimanja poslova iz stava 1. ovog člana, Federalna uprava će od kantonalnih uprava preuzeti materijalna sredstva i zaposlenike koji ispunjavaju formalne uslove.

### **Član 92.**

- (1) Obavezuje se Federalno ministarstvo da, u skladu sa odredbama člana 8. ovog Zakona, u roku od 12 mjeseci od dana stupanja na snagu ovog Zakona, dostavi prijedlog o uspostavi šumsko privrednih područja Vladi Federacije BiH na usvajanje.
- (2) Šumsko privredna područja u kojima nije bilo značajnijih promjena, te nije pokrenut postupak revuzije granica od strne ovlaštenih predlagača u smislu ovog Zakona ne moraju se nanovo uspostavljati nego će se smatrati prijedlogom u skladu sa odredbama stava 1. ovog Člana.

### **Član 93.**

(1) Za područja gdje šumsko privredne osnove ne postoje, Federalna uprava je dužna da u roku od jedne godine od dana stupanja na snagu ovog Zakona donese šumsko privredne osnove za državne šume u granicama šumsko privrednih područja.

(2) Do donošenja šumsko privrednih osnova iz stava 1. ovog člana državnim šumama u granicama ovih šumsko privrednih područja gospodarit će se na osnovu godišnjeg plana gospodarenja šumama. Korisnik šuma je dužan godišnji plan gospodarenja šumama za narednu godinu dostaviti Federalnom ministarstvu najkasnije do 30. novembra tekuće godine u svrhu izdavanja saglasnosti.

(3) Za jedinice lokalne samouprave za koje nisu izrađene šumsko privredne osnove za privatne šume Federalna uprava je dužna da ih donese u roku od jedne godine od dana stupanja na snagu ovog Zakona.

(4) Do donošenja šumsko privrednih osnova iz stava 3. ovog člana Federalna uprava izrađuje godišnje planove sječa i dostavlja ih do 30. novembra tekuće godine za narednu godinu kantonalnom ministarstvu i jedinici lokalne samouprave u svrhu davanja mišljenja.

#### **Član 94.**

(1) Federalna uprava dužna je u roku od dvije godine od dana stupanja na snagu ovog Zakona, pripremiti nacrt Šumarskog programa Federacije i dostaviti ga Federalnom ministarstvu u cilju njegovog donošenja, a u skladu sa članom 5. ovog Zakona.

(2) Kantonalno ministarstvo dužno je izraditi kantonalni šumsko-razvojni plan u roku od jedne godine od dana donošenja Šumarskog programa Federacije.

(3) Za šumsko privredne osnove izrađene prije stupanja na snagu ovog Zakona obim biološke obnove šuma se odnosi na radove u okviru jednostavne biološke reprodukcije šuma.

#### **Član 95.**

Kantonalna ministarstva dužna su u roku od tri mjeseca od dana stupanja na snagu ovog Zakona dostaviti Federalnom ministarstvu dokumente o proglašenju šuma sa posebnim režimom (načinom) gospodarenja.

#### **Član 96.**

Korisnici šuma dužni su u roku od šest mjeseci od dana stupanja na snagu ovog Zakona prilagoditi poslovanje sa odredbama ovog Zakona.

#### **Član 97.**

(1) Federalna uprava dužana je u roku od šest mjeseci sa korisnikom potpisati ugovor o poslovima gospodarenja državnim šumama u skladu sa ovim Zakonom.

(2) Vlasnik privatnih šuma dužan je u roku od šest mjeseci potpisati ugovor sa Federalnom upravom ili pravnim licem za obavljanje stručnih poslova u privatnim šumama o obavljanju stručnih poslova u privatnim šumama u skladu sa ovim Zakonom.

(3) Danom potpisivanja ugovora iz stava 1. i 2. ovog člana prestaju da važe ugovori o prijenosu poslova gospodarenja državnim šumama zaključeni u skladu sa odredbama Zakona o šumama („Službene novine Federacije BiH“, br. 20/02, 29/03 i 37/04) te ugovori i druga pravna akta za obavljanje stručnih poslova u privatnim šumama .

#### **Član 98.**

(1) Fizička i pravna lica koja posjeduju određena prava na državnu šumu dužna su ista upisati u zemljišnu knjigu u roku od jedne godine od dana stupanja na snagu ovog Zakona.

(2) Ukoliko prava iz stava 1. ovog člana ne budu upisana u zemljišne knjige u roku iz stava 1. ovog člana smatraće se kao da ne postoje.

#### **Član 99.**

(1) Federalni ministar će u roku od šest mjeseci od dana stupanja na snagu ovog Zakona donijeti sljedeće podzakonske akte:

- 1) Pravilnik kojim se propisuju elementi za izradu, postupak donošenja i reviziju šumsko privrednih osnova za državne i privatne šume iz člana 11. stav 3. ovog Zakona;
- 2) Pravilnik kojim se propisuje način doznake i sječe stabala i obilježavanja površina za sječu iz člana 14. stav 8. ovog Zakona;
- 3) Pravilnik kojim se propisuju uslovi koje moraju ispunjavati izvođači radova u šumarstvu iz člana 18. stav 4. ovog Zakona;
- 4) Pravilnik kojim se propisuje postupak, uslovi sticanja i održanja licence, vođenje registra izdatih licenci i ostala pitanja u vezi provođenja postupka licenciranja za obavljanje poslova u šumarstvu iz člana 19. stav 5. ovog Zakona;
- 5) Pravilnik kojim se propisuje obim mjera za uspostavljanje i održavanje šumskog reda i način njihovog provođenja iz člana 23. stav 8. ovog Zakona;
- 6) Odštetni cjenovnik iz člana 25. stav 12. ovog Zakona;
- 7) Pravilnik kojim se propisuje sadržaj planova za zaštitu od požara i izgled obrasca na kojem se izvještava o šumskim požarima iz člana 33. stav 8. ovog Zakona;
- 8) Pravilnik kojim se propisuju uslovi pod kojim se vrši paša, žirenje, brst, kresanje grana i lisnika iz člana 35. stav 5. ovog Zakona;
- 9) Pravilnik kojim se određuje način praćenja zdravstvenog stanja šuma iz člana 36. stav 2. ovog Zakona;
- 10) Pravilnik kojim se propisuju uslovi za uzgoj, iskorištavanje, sakupljanje i promet nedrvenih šumskih proizvoda iz člana 37. stav 8. ovog Zakona;
- 11) Pravilnik kojim se utvrđuju uslovi i procedure za zamjenu državnih šuma iz člana 48. stav 7. ovog Zakona;
- 12) Pravilnik o načinu obilježavanja granica državnih šuma, kao i vrsti i postavljanju graničnih znakova iz člana 49. stav 5. ovog Zakona;
- 13) Pravilnik kojim se propisuje način i oblik vođenja registra evidencija iz člana 50. stav 10. ovog Zakona;
- 14) Pravilnik o načinu i obliku vođenja registra evidencija iz člana 52. stav 3. ovog Zakona;
- 15) Pravilnik kojim se propisuje način vođenja katastra šuma za državne i privatne šume iz člana 54. stav 3. ovog Zakona;
- 16) Pravilnik o uslovima i načinu polaganja stručnog šumarskog ispita iz člana 59. stav 4. ovog Zakona;
- 17) Pravilnik o načinu izvršavanja zadataka, obliku i sadržaju legitimacije čuvara šuma i općim kriterijima za utvrđivanje čuvarskih reona iz člana 67. stav 9. ovog Zakona;
- 18) Pravilnik kojim se utvrđuje postupak i kriteriji za dodjelu namjenskih sredstava u oblasti šumarstva iz Budžeta Federacije BiH iz člana 72. stav 3. ovog Zakona.

(2) Federalni ministar će, u dogovoru sa federalnim ministrom trgovine, u roku od tri mjeseca od dana stupanja na snagu ovog Zakona donijeti pravilnik kojim se propisuje način žigosanja, obročavanja, premjeravanja, sadržaj i način izdavanja otpremnog iskaza za drvo, koje potiče iz državnih i privatnih šuma sa teritorije Federacije, kao i način vođenja evidencija, obilježavanja i izdavanja dokumentacije za drvene sortimente u unutrašnjem prometu, trgovini između trećih lica kao i prometu drvnih sortimenata iz uvoza iz člana 25. stav 10. ovog Zakona.

(3) Federalni ministar će, u sporazumu sa federalnim ministrom okoliša i turizma, u roku od tri mjeseca od dana stupanja na snagu ovog Zakona donijeti pravilnik kojim se propisuju elementi za izradu, postupak donošenja i reviziju programa gospodarenja šumama posebne namjene iz člana 26. stav 8. ovog Zakona.

(4) Federalni ministar će, po prethodno pribavljenom mišljenju federalnog ministra finansija/ federalnog ministra financija, u roku od tri mjeseca od dana stupanja na snagu ovog Zakona donijeti pravilnik kojim se propisuje izgled i sadržaj obrasca za obračun i način uplate prihoda iz člana 69. stav 5. stava ovog Zakona.

#### **Član 100.**

Danom stupanja na snagu ovog Zakona prestaju da važe svi zakonski propisi koji regulišu ovu oblast.

#### **Član 101.**

Ovaj zakon stupa na snagu osmog dana od dana objavljivanja u "Službenim novinama Federacije BiH".